

Pip Namp 1 Samuel

Angka Samuel-akert, atyetyart Saul-akert, David-akerr

Angka 1 Samuel alakenh aynteyel

Angka nhenhan artwernem irrpety-akert, itnerneman Samuel, Saul, David. Samuel-an Akngey-wenh artwa angkakert, awank-akerr anenh apmer Israel-itwew. Saul-tangkwel anenh atyetyart ilkwa arrwekeleny, Akngeyelarl arrernew Israel-wenh-rnemew. Arraty-angkwarr-tangkwel ra anenh, Akngeyelarl ilanthew-angkwarr. Ikwer-penh ingwer-ingwer ra ipmelhenhew Akngey-wety, awelhey-angenh-anem ikwer. Akngeyelan David-anem rlwanew, atyetyart ilkwa aneyew, Saul-an menty-anemarl. Saul-el alharlkwew David, rap renh ipmew atweyew-anew akngerr-inger.

Arelh Hannah-el INGKART ayerneyel, away renh antheyew

¹ Artwa anyent anenh itnan Elkanah. Ranap Ephraim-wenh-antey, apmer Ramah-el anenh apwert-ampeny-itwew. ² Artwa Elkanah ra arelh atherr-akert anenh itnan Hannah Peninnah-then. Peninnah-an ampakertarl anenh, Hannah-an arrangkwarl.

³ Aherrety arrpanenhel artwa ra alpenh apmer ikwer-they ikwerenh-rnem-akert apmer Shiloh-warl. Apmer ikwer-itwew ra aylpey-alhenh warl INGKART-wenh-warl, kwener-aynteyew INGKARTew. INGKART ran Atyetyart Ilkwa Ingkerrenhew. Artwamp anenh apmer ikw-erel itna Eli. Artwa alerikw ikwerenh-atherr Hophni Phinehas-then, ingkart-atherr anenh warl INGKART-wenh-itwew. ⁴ Arlta ingwerel Elkanah-el aker tyenkerr anthenh INGKARTew apmellerrel-ayeth, rap ikwerenh-rnemew-then anthenh, arlkwaynteyew. Aker ra anthenh Peninnah-ew ampernemew-then. ⁵ Arelh ingweran ikwerenh Hannah ampewenyarl, INGKARTelarl arrngertewew ampewety. Ikweran Elkanah-el aker akngerrarl anthenh, rarl ikwer ilkelhenhew artewentyel. ⁶ Peninnah-el renh kwanthenh ahellerreyew-atety, ra ampewenyarl. ⁷ Aherrety arrpanenh alakenh ayntenh. Ap-melerr Hannah aylpenh warl INGKART-wenh-warl, arelh ingwerelan renh kwanthenh, rap artnenh-anem. Arlka ra apmwerrenh, nthakenh arlkwey-angenh. ⁸ Mpwernikwan ikwer angkenh, “Nthakenh ngan irreyel? Artney-angenh. Arlkwemer ntwaw. Arlka apmwa aney-angenh. Ampa irrwey atnyenyew iterrey-angenh artewenty. Ayengan ngkweng ilkelheyel artewenty!”

⁹ Ingwer-ingweran, rernemarl arlkwenh-penh apmer Shiloh-itwew, Hannah-an rtnerl-alhew-anem. Rap alhew warl INGKART-wenh-warl, angkaynteyew ikwer. Artwamp Eli-an anenh arriw-itwew. ¹⁰ Hannah-an arlkarl apmwerrew

innga, rap artnemel angkenh INGKART ikwer.
¹¹ “INGKARTay! Ngan Atyetyart Ilkwa Ingkerrenhew! Ayengan arwa warrkenh ngkwenh. Amperrngerra atyeng, ayengan arlka apmwarl. Iylpelerlewey-angenh ayenh. Nhaym atha ngenh ayerneyel. Awey atyeng antha! Ntwa ayenh away anthem, athap ngenh angkep antheynem, raw ngkweng warrkerreyew ampwerreyew-atety. Nthakenh alta renh akey-angenh, ingwer-nemel renh areyew, ra ngkwenharl.”

¹²⁻¹³ Rap intem-antey arreytemel angkenh INGKART-warl arleng-alenty. Eli-el arew, arraktantarl akngelhenh, away-angenh. Ra iterrew ikwer terangkew-arrpantey, ¹⁴ rap angkew, “Ilekew nga terangkan apetyew? Ngkwarl yanh iwa!”

¹⁵ Hannah-el tyernew, “Arrangkw artwampay! Ayengan terangk-wenyarl. Ayengan arelh arlkarl apmwerreyelarl. Ngkwarl atha antywey-angenh, arrangkw. Ayengan arreytenh alyepel INGKARTewarl, ikwer ilelhenh. ¹⁶ Ayenh apmwa antwey-angenh. Ayengan artnemelarl anenh. INGKART atha ayernenh, ayenh alpemeleyew.”

¹⁷ Eli-an angkew, “Irrepern nga! Artewenty iterrey-angenh alpanem. Anantherr Israelwenh-rnemel Akngey mwerr-angker apentem. Ra anthemarl, ntwa renh ayernentyan.”

¹⁸ Hannah angkew ikwer, “Nga mwerr-angkwarrarl atyeng angkew.” Rap anperl-alhew mwerr awelhemel, amern-anem arlkwey-ल्पew.

¹⁹ Arlta ingwerel ingwepenh Elkanah akwentew, rap alhew ikwerenh-rnemakert anyent-inger-anem, INGKART-warl

kwenerremel angkaynteyew. Ikwer-penh rernem angkep-anem alpew apmer Ramah-warl.

INGKARTel Hannah iylpelerlewey-angenh-antey, rarl ayernenhew. ²⁰ Ikwer-penh ingwer-ingwer ra away-anem atnyenew, rap renh itnewew Samuel. Rap angkew, "Atha renh itnewem Samuel, atharl INGKART ayernew-angkwarr-antey, renh atyeng antheyew."

Hannah-el arretengeleyel, away Samuel antheyew INGKARTew arrwekel-antey

²¹ Aherrety anyent-penh Elkanah alhew ikwerenh-rnem-akert apmellerrel-ayeth apmer Shiloh-warl, kwener-aynteyew INGKART-warl, aker tyenkerr-then anthaynteyew ikwer. Elkanah-el ikwer antheyew, rarl arrwekel-antey arretengelew. ²² Arelh Hannah-an artenyarl anew. Rap angkew, "Aweyan atha aylpatyel-antey wanteyel. Rarl aylpaty-wety ipmelhem, athap renh akngemarl Shiloh-warl, INGKART-warl-anem antheyew. Ra anayntem-then ikwer-itwew."

²³ Elkanah-el tyernew, "Kel. Ngarl ilkelhem alakenh. Alerl anayntenh-atherr, away aylpaty-wety ipmelhentyew. INGKARTel ngenh alpemelem, ntwarl arretengelew-angkwarr." Hannah-an anenh away ikwerenh alerl-antey alkenhelenh, rarl aylpaty antywenh-antey-akert.

²⁴ Aherrety irrpety-penh aweyel amernant-anem arlkwenh. Elkanah alhew ikwerenh-rnem-akert apmellerrel-ayeth warl INGKART-wenh-warl Shiloh-warl. Amenheng-atherran alhew-anem ikwer-rnem-angkwarr. Rernem akngew

pwelek irrwey ilkwa, amern arlety ampwerrk, ngkwarl-anem arranty nanikwet yenp-penh-akert. ²⁵ Elkanah-el Hannah-el-then pwelek ipmew atwew INGKARTew, ratherr away-then akngew artwamp Eli-warl. ²⁶ Hannah angkew ikwer; “Artwampay, ntwā ayenh iterl-areyel apek? Awank-akerr ayengan rtney-alhenh ngkweng-itwel, artnemel angkenh INGKART-warl. ²⁷ Atha ayernenh, ampa ayenh antheyew. Rap ayenh awew, nhanemap ayenh anthewan, atharl ayernewan. ²⁸ Aleyan atha renh anthem INGKART-warl-anem. Ra warrkerr-aynteyew ikwer ampwerreyew-atety.” Rarl renh ilew, INGKARTelarl renh awew, Eli ra kwernerrew INGKART-warl-anem.

2

... ¹¹ Ikwer-penh Elkanah angkep alpew ikwerenh-rnem-akert apmer Ramah-warl. Away ran anenharl Shiloh-itwew. Eli-elan renh akalty-anthenh, INGKARTew warrkerr-aynteyew.

Eli-wenh alerikw apmwatherr

¹² Eli-wenh alerikw-atherr, Hophni-atherr Phinehas-atherr, ratherr ingkart apmwatherr anenh. INGKARTew awelhey-angenh ratherr anenh. ¹³ Ingwerentyel INGKARTew aker anthenh, ratherr aker inenh apmwangkware artwa ikwer-they. INGKARTel awank-antey alakenh ilew, “Ingwerentyel aker anthem atyeng, artwa ingkartel aker anter-tangkwel rwel arrtyemer atyeng. Artwa akerew-arteyel kwatyel tyelk arrtyem, artwa ingkartel ra

inem-anem ikwerew.” Ratherranap apmwel-ayetharl inenh alakenh. Ingwerentyelarl aker arrtyenh, ratherr warrkenh anyent thwenenh, ikwer-atherr inaynteyew. ¹⁴ Warrkenhel fork arlpenty ilkwel atanthenh. Aker akngerr apek ra inenh, aker akely apek. Ratherr inenh alakenh apmwel-ayeth akngerr-wenh. Ratherrap Israel-wenh-rnem ingkerrew irrkaty-angkwarr mpwarenh, rernemarl alhenh apmer Shiloh-warl, aker INGKARTew anthaynteyew. ¹⁵ Ratherr mpwelhey-angenh, anter-tangkwel arrtyeyew, arrangkw. Artwa warrkenh ra angkenh artwa akerew-artey ikwer, “Aker artwa ingkartew-atherr antha, ratherr rwel arrtyemel arlkweyew. Aker kwaty-penhew ratherr ilkelhey-angenharl. Aker arlety ikwer-atherr antha!”

¹⁶ Artwel ra apek tyernem, “Alerl anter-tangkwel arrtyey-ingkerr. Ntwap aker inem-anem.” Warrkenh ran angkenh, “Arrangkw! Anamerl ayenh anthay, rakerl-alhewerr-anem atha ngenh!”

¹⁷ Alakenh Eli-wenh alerelikw-atherran mpwarenh apmwangkwarr innga. Ratherr angka INGKART-wenh awelhey-angenh. INGKARTan ahelerrew ikwer-atherr.

Hannah-el Samuel arerlenty-akngenh

¹⁸ Awey Samuel ra warrkerrenh INGKARTew. Ra aylpenh artwa ingkart-wenh arnkwel. ¹⁹ Aherrety arrpanenh amelikw ikwerenh kwet akely rlengkeny mpwarenh ikwer artwa ingkart-wenh-apeny. Rarl alhenh apmelerr-angkwarr

apmer Shiloh-warl, rap kwet rlengkeny akngenh ikwer. ²⁰ Eli-el INGKART ayernenh Elkanah-ew Hannah-ew-atherr alakenh, “INGKARTay, ntwā arelh nhenh anthew avey akely, rarl ngenh ayernenh. Rap ngkweng-anem anthew. Antha nhenh-atherr ampa ingwer-rnem-anem.” Ratherrap alpenh apmer-warl-anem angkep. ²¹ Inngarl INGKART mwerr anenh Hannah-ew. Ikwer-penh ra ampa ingwer-rnem-anem atnyenew; avey-rnem irrpety, kwey atherr.

Ikwereng-arey-antey Samuel ra ilkwerrey-nenh INGKART-wenh warl-itwew, warrkerrenharl ikwer.

Eli-el alerikw-atherr ilteyel

²² Eli-an artwamp innganem. Ra awenh, alerikw ikwerenh-atherrelarl apmwel-ayeth mpwarenh Israel-wenh-rnemew. Ra awenh arrpemar, ratherrarl irrtyertel alenh arelh warrkenh-rnem-akert, INGKART-wenh kalikwelar, warrkerrenh-rnem, arriwarl arntarnt-arenh-rnem. ²³ Rap angkew ikwer-atherr, “Akngerrrel ayenh ileyel, mpwelar apmwa innga mpwareyel. Ilekew mpwel alakenhan apmwelheleyel? ²⁴ Akngerran angkerreyel mpwelew, apmwel-ayetharl mpwareyel, rernemap apetyem ayenh ileyew. ²⁵ Mpwel iterl-arem, artwa anyent apmwelhelem ingwerew, Akngeyarl ikwer katy angkem apek. Artwa anyent apek apmwelhelem INGKART-warl-athek, nthakenh ingwer ikwer katy angkey-angenh-anem, arrangkwarl.”

Alerikw ikwerenh-atherranap ikwer awelhey-angenharl, arrwekel-anteyarlap INGKARTan iterrew, renh-atherr ilwerl-atheneyew.

²⁶ Awey Samuel-an ilkwerreynenh arraty-angkwarr. INGKART ikwer ilkelhenh artewenty ingwer-rnem-then. ...

3

INGKART arlkeyel Samuel-ew

¹⁻² Awey Samuel-el ra artwamp ingkart Eli alpemelenh. Warrk ikwerenh alakenh ayntenh INGKARTew. Eli artwamp innganem irrew, arrkay-anem arenh. Rarl anenheng-arey, INGKART irrpetyapewant angkenh. Irrpetyapelant altyerr INGKART-wenh arenh.

Ingwa ingwer-ingweran artwamp ankwayntenh. ³ Samuel ra amerrk-anem, rap ayntenh-anem warl INGKART-wenh-itwew, box impen Akngey-wenh-angkwarr. Atemwengkel-antey, lyenenty anter alip-akert ampenh-antey. ⁴ INGKART arlkew awey ikwer, "Samuel-ay!"

Ra tyernew, "Yew! Ilekay?" ⁵ Rap anterrew Eli-warl angkey-alhew, "Ilekay? Nga atyeng arlkew."

Eli-an angkew, "Arrangkwew. Ayengan arlkey-angenh. Alpa ayntey-alpa." Rap alpew ayntey-alpew-anem. ⁶ INGKART arlkew arrpemarl Samuel-ew, "Samuel-ay!" Rap akwentew, anterrew Eli-warl arrpemarl angkey-alhew, "Ilekay? Nga atyeng arlkew."

Artwampan angkew, "Aweyay, ayeng ngkweng arlkey-angenh. Alpa ayntey-alpa."

⁷ Samuel-elan INGKART iterl-arey-angenh-antey, arrangkw-antey. Aleyant ikwer angkw alakenhan, ranap alhengk-awey-angenh.

⁸ INGKART arlkew arrpemar, "Samuel-ay!" Rap akwentew, Eli-warl arrpemar anterremel angkey-alhew, "Yew! Ilekay? Nga atyeng arlkew." Artwampel iterl-arew-anem, INGKARTarl arlkenh ikwer, ⁹ rap angkw, "Alpa ayntey-alpa. Ingwerenty ngkweng arlkenty, angka alakenh, 'INGKART, angka atyeng-warl. Ayengan awelhem-anem ngkweng.'" Ra alpew ayntey-alpew arrpemar.

¹⁰ INGKART rtney-alhew arrer-anem Samuel-itwew, rap angkw ikwer irrkaty-angkwarran, "Samuel-ay!"

Samuel angkw, "INGKART, angka atyeng-warl. Ayengan awelhem-anem ngkweng."

¹¹ INGKART angkw ikwer-warl, "Atha mpwarem ingwer-ikwer-anem apmer nhenh Israel-itwew. Ingwer-rnem apateyelpenyh, rernemar aweyenh alakenh. ¹² Eli-rnem

atha ilwerl-atheneyew, atharl ilew-angkwarr arrwekel-antey. ¹³ Alakenh atha renh ilew,

'Ayengan ahel-anem irreyel ngkweng ngkwenh-rnemew-then, athap arrenhantherrenh ilwerl-atheneyenh. Ntwa iterl-arenhan, artwa

alerengkw ngkwenh-atherrarl nyerr-weny awelhey-angenh angka atyenew anenh.

Ingkerrenh ikwer-atherr ilkelhey-angenh-anem irrew. Ntwan renh-atherr artwereley-angenh, arrangkw. ¹⁴ Alakenh-wety atha arrwekel-antey

ngenh ilenh ngkwenh-rnem-then, "Arrantherran apmwelelhew akngerr-inger-anem. Aker

arrtyey-angenh-anem atyeng-warl, arrangkw-anem. Nthakenh ntwā ayenħ apmwa nhewetyan arternpeley-angenh.” ’ ” ¹⁵ Samuel-elarl awewpenh, rap aynteynew-anem.

Ingwepenh-antey ra arriw altywerelew warl INGKART-wenh-itwew. Ra atererrew, Eli ilewerr, INGKARTarl ikwer angkew. ¹⁶ Artwampan arlkew ikwer, “Samuel apetya!”

Samuel-el tyernew, “Yew! Ilekay?” ¹⁷ Artwampel ayernew, “Nthakenh Akngeyan angkew ngkweng-warl? Ila atyeng-warl arraty. Ntwā arraty atyeng iley-angenh, Akngeyan ngkweng ahelerrem artewentyel.”

¹⁸ Samuel-el ilew arraty-antey angka ingkerr akertew-atety. Eli angkew, “Inngarl ran INGKART ilkwarl. Ra arraty-angkwarr mpwarem.”

¹⁹ Samuel ra ilkwanem irrew. Angkernem rarl angkenh, innganemarlāp rerneman, INGKARTarl ikwer-itwel anenh. ²⁰ Akngerrrel Israel-wenh-rnemel renh iterl-arenh. Rernem ingkerrenhel iterl-arenh, Samuel rarl artwā angkaker INGKART-wenh anenh. ²¹ Akngerr-inger INGKART aremerrey-alhenh ikwer-warl apmer Shiloh-itwew. Ra renh akalty-anthenh, arraty angkaynteyew.

4

¹ Alakenh Samuel angkenh Israel-wenh-rnemew.

Philistia-areny-rnemel irrtiert-ineyel box impen Akngey-wenh

Ingwer-ingweran artwā ahawarr akngerr Philistia-areny-rnem akarrerrew, atwerreyew

werreyew-then pewenarrel Israel-wenh-rnem-then. Israel-wenh-rnem aynthey-alhew apmer Ebenezer arrerenty. Philistia-areny-rneman aynthey-alhew apmer Aphek arrerentyarl, ipert ingwer-ampenyarl. ² Rernem alhew ampep-warl, werreyew Israel-wenh-rnem-then. Philistia-areny-rnemel renh-rnem ipmew atwew, akngerr innga, 4,000.

³ Israel-wenh-rnemarl alpew angkep apmer ikwer-rnem-wenh-warl, artwamp-rnem ayernerrenh, “Ilek-wety INGKARTel renh-rnem tyarlewew, anewantherrenh-rnem atweyew? Apmer Shiloh-warl alhey, box impen Akngey-wenh inerleweyew. Anantherr box renh atnyenyew atwerrentyeng-arey Philistia-areny-rnem-then. Akngeyelan anenhantherrenharl alpemelem.”

⁴ Rernemap artwernem thwenew Shiloh-warl, box impen Akngey-wenh inerleweyew. Rerneman iterrew, “INGKART Ilkwa Ingkerrenhew ra box-itwew aneyel aympelh-akert atherr ampepel.” Artwamp ingkart Eli alerikw ikwerenh-atherr, Hophni Phinehas-atherr, ratherr alhew arrpemar, box impen arntarnt-arenhey-alpaynteyew.

⁵ Rernemar, akngey-alpew box renh, Israel-wenh-rnem inkwerelhemel arlkalhelerrew. Arkewarrel ahern akngenhelhelew. ⁶ Philistia-areny-rnemel awew, rernemap ayernerrew, “Nthakenh irreyel? Ilekewarl Israel-wenh-rnem arlkalhelerrew?”

Rernemar, awew, Israel-wenh-rnemel box impen Akngey-wenh atnyeny-alpew, ⁷ rernemap

atererrew. Rernemap apatemel angkerrew, “Pw-ertay! Akngey ikwer-rnem-wenh ikwer-rnem-warl-anem apetyew! Aleyant alakenh irrewan! Irrwernelhew innganem anantherr! ⁸ Nthakenh ingwerentyel anenhantherrenh arntarnt-arey-angenh nhelkwer-wety! Anantherr awew, rarl apmwa innga mpwarew Egypt-areny-rnemew arlpaw-ampeny-itwew. ⁹ Anantherr Philistia-areny-rnem rlterrk-antey aneyew! Renh-rnem antengeleyew, anantherraw atyetyart ikwer-rnem aneyew. Rernem anewantherr atyetyartarl anewerr! Atererrey-angenh ikwer-rnem-wety! Artewenty atweyew anantherr!”

¹⁰⁻¹¹ Rernemap inngarl rlterrk alhew ikwer-rnem-angkwarr, ipmew-anem atwemel artwa ahawarr Israel-wenh-rnem 30,000. Ikwereng-arey Philistia-areny-rnemel irrtyert-inew box impen Akngey-wenh. Eli-wenh alerikw-atherr, Hophni-atherr Phinehas-atherr, ratherr ilwew arrpemar. Ingwer-rneman arlperrtyarl anterrew, apmer-warl angkep alperlewew.

Eli ilweyel

¹² Arlta ikwerel-antey artwa anyent angka apmwakert anterrew, rernemar atwerrenhthey. Ranap Benjamin-wenh-antey, rap anterrey-nenh apmer Shiloh-warl, arleng innga. Arlka apmwa innga anterrenh; arnkwa ra ilterrew, akapwert-warl ahern arrernelhew ikwer-rnem-wenh-angkwarr, rarl ikwer-rnem artewenty amperrngerrew.

¹³⁻¹⁵ Eli-an artwamp innganem, 98, aparrnganem. Ra anenh arriwel arntarnt-arelhemel,

chair-el anerl-anemel. Ra atererremel iterrew artewenty, apmwa innga ayntewerr box impen Akngey-wenh ikwer.

Artwa rarl apmer-warl aremerrenhew, angka apmwa ilerl-apenh, akgerran artnalhelerrew-anem. Eli-el awew, rap arlkew artwa ikwer, “Nthakenh irreyelay? Ilekewarl akgerr artnalhelerreyel alakenhan?”

¹⁶ Artwa ra anterrew Eli-warl angkey-alhew, “Artwampay! Ayengan anterrey-alhew, rerne-marl atwerrenh-they!”

Artwampel ayernew, “Nthakenh irreway?”

¹⁷ Ra tyernew, “Anantherr Israel-wenh-rnem anterrey-ल्पew Philistia-areny-rnem-wety. Rernem artwa ahawarr ingwer-rnem anewantherrenh-rnem atwew, alerengkw ngkwenh-atherr-then. Box impen Akngey-wenh rernemap irrtyert-inew anewantherr-they!”

¹⁸ Eli-an anenh-antey chair ikwer-itwew. Rarl awew, Philistia-areny-rnemelarl box impen irrtyert-inew, rap aytnew artepel-ayeth ahern-warl. Artwamp antyely irrewarl innga, rap rternng-anem akelhew. Artwa ilkwa ra anenh Israel-itwew aherrety 40-ew-atety. ...

5

Akngeyel apmwel-ayeth mpwareyel Philistia-areny-rnemew

¹ Philistia-areny-rnemel irrtyert-akngeynew box impen Akngey-wenh. Ebenezer-they akngeynew apmer ingwer-warl Ashdod-warl, Philistia-itwew. ² Rernemap aylpenhew ikwer-akert warl Dagon-wenh-warl. Dagon ampwal

ilkwa apwert-penh arnwarnew. Philistia-areny-rneman kwenerrenh ikwer-warl inngewarl-arrpantey. Rernemap arrernew box impen ikwer-itwew.

³ Ingwepenh ingwerelan Ashdod-areny-rnem akwentew, rernemap arew ampwal ikwer-rnem-wenh, ahernel-anem atnertel-ayeth ayntenh. Arrwekel-ampeny box impen-itwew ra ayntenh. Rernemap renh rnkerneynew angkep arrpemar.

⁴ Ingwepenh ingwerelan rernem arew, ampwal ra aytnew arrpemar. Arrwekel-ampeny box ikwer-itwew ra ayntenh ahernel arrpemar, atnertel-ayeth. Arlkan mwerr-antey akelhey-angenh-anteyarl. Akapwert akwatherr akelhewarl, arriw-itwew ayntenh aketh-itwew. ⁵ Warrkenh Dagon-wenh-rnemel ampwal arnangelew arriw-wety. Rernem ingwer-rnem-then arraty alhey-angenh-anemar arriw-angkwarr. Rernem atnarnpenhenh-anem ikwer-angkwarr, warl ikwer-warlarl aylpenhenhan, ampwal renh lthwenewerr-arrpantey. Rernem atnarnpenhenh-antey angka nhenhan ingkwernenheng-arey.

⁶ INGKARTEL apmwel-ayeth mpwarew Ashdod ikwer-ampeny-areny-rnemew. Ingkerrenh wangkew tywen-angketyarr-anem. ⁷ Ashdod-areny-rnemel arew arntety apmwa, rernemap angkerrew, "Anantherr Akngey Israel-areny-angkwarr irrwernelhew innganem. Dagon-an Akngeyel atwem arrpemar! Iwemer anantherr box Akngey-wenh!" ⁸ Rernem yangkelhew, artwa ilkwa apmer ingwer-ampeny-areny-rnem apetyeyew, akarrerreyew Ashdod-itwew.

Rernemap renh-rnem ayernew, “Nthakenh ilem anantherr box Akngey Israel-areny-wenh nhenhan, arntety-wety?”

Rernem tyernew, “Apmer ingwer-warl Gath-warl-anem thwenenh-arey.” Box renhap rernem apmer Gath-warl-anem akngeynew.

⁹ Rernemarl akngeynew-penh, INGKARTel apmwel-ayeth mpwarew Gath-areny-rnemew-anem irrkaty-angkwarr, ater-anthew renh-rnem artewenty. Ingkerrenh wangkew tywen-angketyarr, akely-rnem ilkwernem-then. ¹⁰ Kel Philistia-areny-rnemel box renh apmer ingwer-warl-anem Ekron-warl akngeynew.

Rernemarl arrer-anem irrew box ikwer-akert apmer Ekron-warl, akngerr ikwer-areny arlkahellerrew arnarewarlel. “Pwertay mentyaw! Nhenh-rnemelan box renh Akngey-wenh apmer nhewarl-anemarl akngetyew! Ilwerl-atheneyenhanap ingkerrenh!” ¹¹ Rernemap yangkelhew, artwa ilkwa apmer ingwer-ampeny-areny-rnem apetyeyew, akarrerreyew arrpemar. Ekron-areny-rnem ikwer-rnem angkew, “Box yanh iwey! Thweneyney angkep apmer ikwerenharl, ingkerrenh-anem ipmew atwewerr apmer arrpanenh-itwew Philistia-ampeny!”

Ilwernerrew akngerr arntety ikwer-penh. INGKARTel ater-anthew renh-rnem alakenharl. Rap apmwel-ayeth innga mpwarew Philistia-areny-rnemew. ¹² Ingwer-rnem iteth-antey anenh-rnem, arntety ilkwakert anenh tywen-angketyarr. Rernemap altyerr ikwer-rnem-

wenhew arkalhellerrenh, renh-rnem ayerneyew mwerreleyew. ...

7

1-2 [Kel Philistia-areny-rnemel thweneynew angkep box impen Akngey-wenh Israel-warl. Israel-wenh-rnemelan] akngeynew apmer Kiriath Jearim-warl, warl Abinadab-wenh-warl apwert irrwerl-warl. Rernemap arrernew alerikw ikwerenh Eleazar, box renh arntarnt-araynteyew. Box ra rtnenh aherrety 20-ew-atety warl ikwer-itwew.

Samuel-an artwa ilkwa aneyel Israel-itwew

Ikwereng-arey Israel-wenh-rnem alpwey anenh, intem-antey ayernenh INGKART, renh-rnem alpemeleyew. ³ Samuel-el renh-rnem ayernew, “Inngang arrantherr angkepperrem INGKART-warl? Arrantherrap alakenh irremer. Iwenh-arey ilek-ilek yanh-rnem arwerl-penh apwert-penh. Ampwal yanh-rnem iwenh-arey amarl-arrpantey itnan Astarte-rnem. Ampwal yanh-rnem Israel-areny-weny, arrangkw. Apmer ingwer-areny-wenh. INGKART anyentewant nakemel kwenerreyew, rap arrenhantherrenh arntarnt-arem Philistia-areny-rnem-wety.”

⁴ Rernemap awelhew, iwemel ampwal renh-rnem, artwarrpantey itnan Baal-rnem amarl-arrpantey itnan Astarte-rnem-then. Rernemap INGKARTewant-anem nakemel kwenerrenh.

⁵ Ikwer-penh Samuel yangkelhew Israel-wenh-rnemew, “Akarrerrenh-arey apmer Mizpah-itwew. INGKART atha ayerneyew arrewantherr.”

⁶ Akgerr akarrerrew-anem apmer ikwer-itwew. Samuel atyetyart ikwer-rnem anenh. Kwaty rernem inpew, thelemel ahern-warl. Alakenh rernem INGKARTew ilelhew nyerrerremel apmwa ikwer-rnem-wenh-they. Arlta ikwerel rernem amern arlkwey-angenh anenh, rernemap ilelhew, “Apmwel-ayeth mpwarew anantherr INGKART-angkwarr.”

⁷ Philistia-areny artwa ilkwernemel awew, Israel-wenh-rnemarl akarrerrew Mizpah-itwew, rernemap atnwenhew artwa ahawarr akgerr apmer ikwer-warl. Israel-wenh-rnemel awew, ingwer-rnemarl apetyenh, rernemap atererrew. ⁸ Rernemap angkew Samuel-warl, “INGKART katy ayern-aynta anewantherr, ipmelhey-angenh. Ayerna, anenhantherrenh mwanty arntarnt-areyew ikwer-rnem-wety.” ⁹ Samuel-el inew yep-yep akely, rap renh arrtiyew ingkerrenh-antey INGKARTew. Ra ayerneynehh intem Israel-wenh-rnemew, INGKART rap renh awew-anem.

¹⁰ INGKARTel alakenh mpwarew, rarl Samuel awewel. Samuel rarl yep-yep akely arrtiyehengarey, Philistia-areny-rneman arrerarl apetyenh ahel apmer ikwer-warl. INGKARTelap arwerlk ilkwa angkelh-angkelhelew awely-awely-apeny. Philistia-areny-rnem atererrew artewenty innga apatemel, rernemap aterel-anem anterreynew. ¹¹ Israel-wenh-rnemel alwernew Mizpah-they apmer Beth Car-ew-atety, akgerr ipmew atwenhew ampep-itwew. ¹²⁻¹³ Philistia-areny-rneman arlperrty anterrew apatemel, arlengalenty alpew, apey-alpey-angenh apmer Israel-

warl. Samuel rap apwert ilkwa anyent inew, rnkernew-anem ampep-itwew apmer atherr-itwew, Mizpah-itwew Shen-itwew-then, ingkerrel iterl-araynteyew. Rap angkew, "INGKARTEL anenhantherrenh arntarnt-arenh." Rap apwert renh itnewew "Apwert Arntarnt-arey-angker-wenh."

INGKARTEL renh-rnem arntarnt-arenh arleng-alenty Philistia-areny-rnem-wety, Samuel iteth-antey anenheng-arey. ...

8

Israel-wenh-rnemel ayerneyel, atyetyart ilkwa ikwer-rnem arrerneyew

¹⁻² Samuel alerikw atherr-akert. Alerikw ilkwan itna Joel, alerikw akelyan itnan Abijah. Aynarlewarl artwamp-anem irrew, ra arrernew renh-atherr ilkwa Israel-wenh-rnemew. Ratherr court-ew-artey-atherr, apmer Beersheba-itwew warrkerrenh. ³ Ratherranap aynarlew-apeny-weny. Anketyarlap ratherran, apwertant in-aynteyew iterrenh. Artwa apmwel-rneman renh-atherr apwert anyelkel anthenh, ratherraw renh-rnem court-itwew tyarlew-aynteyew.

⁴ Ingwer-ingweran artwamp-rnem akarrerrew apmer Ramah-itwew, angkeyew Samuel-warl. ⁵ "Ngan artwamp-anem irrew. Alerengkw ngkwenh-atherr ngapeny-weny. Ratherran mwerr-wenyarl ilkwa aneyew anewantherr. Ntwa arrernemer artwa ilkwa anyent, atyetyart anewantherr aneyew. Apmer ingwer-rnem-itwewan atyetyart ilkwa anyentarl aneyneyel.

Anantherran ilkelheyel irrkaty-angkwarr arrpe-marl.”

⁶ Samuel-an arlkarerrew, rernemarl alakenh angkew-wety. Rap angkey-alhew INGKART-warl. ⁷ INGKART angkew ikwer, “Awelha ikwer-rnem, rernemarl ayerneyel-angkwarr. Rernem ngkweng-wety arlkarerrey-angenharl. Inngan atyeng-wetyarl rernem arlkarerreyel. Ilkelhey-angenh atyeng, ayeng atyetyart aneyew ikwer-rnem, arrangkw-anem. ⁸ Awank-akerr alakenh aytew, atharl arrwekeleny-rnem atnwenhey-alpenh apmer Egypt-they. Rernem intem-antey atyeng-wety angkeperrenh, ampwal apmer ingwer-areny-rnemew kwenerrenh. Aleyan rernem irrkaty-angkwarr-antey mpwareyel. Ngkweng-wety-anem arlkarerreyel arrpemarl. ⁹ Mwerrarl ikwer-rnem awelheman. Menty rernem atyetyart ilkwa ingwer iney. Mwanytangkwel angka ikwer-rnem, ‘Atyetyart yanh-ikwer anenty, rap rlterrkarl mpwarem arrewantherr. Rap ilanthem, ilek-ilek mpwareyew rlterrk-angkwarr ikwer.’ ”

¹⁰ Samuel-el artwamp-rnem ilew, INGKARTarl angkew-angkwarr. ...

¹⁹ Rernem awelhey-angenh ikwer. “Ar-rangkw! Artwa atyetyart anyent anewantherr arrerneyew! ²⁰ Apmer ingwer-rnem-itwewan artwa atyetyart ilkwa anyentarl aneyneyel. Anantherran ilkelheyel irrkaty-angkwarr arrpe-marl. Atyetyart rap atnwenh-ayntem anenhantherrenh, atwerr-aynteyew ingwer-rnem-itwew.” ²¹ Samuel alhew, INGKART ileyew,

rernemarl angkew-angkwarr. ²² INGKARTel tyernew, "Awelha ikwer-rnem. Atyetyart yanh-ikwer arrerna ikwer-rnem."

Samuel angkew artwamp-rnemew, "Kel. Alakenh mpwarem atha. Alpenh-arey-anem apmerwarl ingkerr."

9

Samuel-el Saul rlwaneyel, atyetyart aneyew Israel-wenh-rnemew

¹ Artwamp ilkwa anenh itna Kish, ranap Benjamin-wenh-anteyarl. ² Kish-wenh alerikw itnan Saul-arl. Artwa akely inngerr mwerr-angkerarlap ran, arlpenty innga ingwer-rnem-angkwarr anenh, Israel-itwew.

³ Artwamp Kish-el tangkey akngerr atnyenenh. Ingwer-ingweran tangkey-rnem ingwer-angkwarr irrtiyert-alpew. Kish-ap angkew alerikw Saul-ew, "Nga warrkenh anyent-then alhenh-atherr, tangkey-rnemew nthweyew." Ratherrap anperl-alhew, ⁴ nthweyew Ephraim-itwew apwert-angkwarr-tangkwel, ikwer-they Shalisha-ampeny-angkwarr-anem. Arrangkw-antey, arey-alhey-angenh-antey. Ikwer-they ratherr nthweyew alhew Shaalim-ampeny-warl-anem. Arrangkw-antey. Benjamin-ampeny-anem arrangkw arrpemarl ywarew.

⁵ Ratherrap alhew Zuph-ampenyew-atety-anem. Saul angkew, "Arleng-alenty aylanth apetyew. Angkep alpey, akngey atyenh artewenty iterremel mpwelherl-anewerr aylewanth, tangkey weth-rneman menty-anemarl ipmey."

⁶ Warrkenhel tyernew, "Alerl-antey. Artwamp

weth-alew, angka Akngey-wenh-akert? Ra apmer nhel arrer-antey aneyel. Tyak inngarl ran. Aylanth renh ayernemer. Ra apek iterl-areyel, tangkey-rnemarl alpew.” ...

¹⁴ Ratherrarl apmer ikwerel aremerrew, ratherrap artwamp Samuel arnarew. Ra alhenh apwert-warl, reknemarl aker arrtyenh-warl INGKARTew. ¹⁵ Arrwekel-antey INGKARTel renh ilew alakenh, ¹⁶ “Atha areyel, atyenh-rnemarl ingwer-rnemel alhengkerr-antheyel. Rernem ayenh ayernenh, athap renh-rnem awew. Ingwelarreng atha artwa akely thwenem ngkweng-warl, ranap Benjamin-wenh-anteyarl. Rap atyenh-rnem arntarnt-arem Philistia-areny-rnem-wety. Anter alip theleyew akapwert-warl. Alakenh renh atyetyart arrerneyew atyenh-rnemew Israel-wenh-rnemew.”

¹⁷ Samuel-el Saul warrkenh-then arnarew, INGKARTe angkew ikwer, “Yanh ra apetyeyel, atharl ngenh ilew apmwerrel. Ran atyenh-rnemew atyetyart aneyenh.” Samuel mpwelhew ikwer-atherr keyt-itwew.

¹⁸ Saul-el iterl-arey-angenh artwamp renh, arrangkw-antey. Rap angkey-alhew ikwer apal, “Artwamp altyerr arey-angker aneyel apmer nhenh-itwew. Nthekarlap warlan ikwerenh?”

¹⁹ Samuel-el tyernew, “Ayengaw, altyerr arey-angkeran. Mpwelanth alhenh-atherr arrwekel apwert yanh-warl, akerarl arrtyem-warl INGKARTew. Rlengkan mpwelanth amern arlk-wem atyeng-itwel. Ingwelarreng atha ngkweng-warl anayntelemel ilem, ngarl akwerrng iter-reyel. Mpwelanthap apmer-warl-anem alpem.

20 Tangkey weth-rneman anterrewarl arlta ir-petyel, menty-anemarl ipmey. Ingweren-tyel renh-rnem arey-alhew kel-antey. Angka nhenhew-anem iterra. Ntwa apek awew, akngerr alakenh angkerrew, 'Artwa Kish-wenh-anteyarl rlwaneman, atyetyart anewantherr aneyew Israel-wenh-rnemew?' " ...

25 Rernem apey-alpew apwert irrwerl-they ap-mer Samuel-wenh-warl. Samuel-el Saul atnwen-hew warl irrwerl-warl alkey-warl, ratherraw angkerreyew. Ingwelan Saul-then warrkenh-then ayntew irrwerl arlkarl-itwew.

26 Ingwepenh-antey Samuel arlkey-ayntew Saul-ew, "Akwentenh-atherr, apmer-warl-anem alpeyew." Saul-then Samuel-then keyt-warl-athek-anem anperl-alhew. 27 Samuel angkew-anem ikwer, "Artwa warrkenh yanh thwena, arrwekel irreyew. Ngan alerlarl mpwelha. Atha ngenh angka INGKART-wenh-tangkwel iley-alkeh." Warrkenh ra anperl-alhew arrwekel.

10

1 Samuel-el anter alip inew, thelemel Saul-warl akapwert-warl. Rap renh arrwantyew arreyel atherr-angkwarr ikwer-rnem-wenh-angkwarr angkemel, "INGKARTel ngenh arrerneyel, atyetyart aneyew ikwerenh-rnemew. Ntwap renh-rnem arntarnt-arem ahelengkw-rnem-wety apmer arrpanenh-areny. ... 6 Inweng INGKART-wenh ngkweng-warl arrerneyenh, arrawarregel ngenh rlterrkeleyew. Ntwap angka INGKART-wenh ileyenh, angkakert

Akngey-wenh-rnemar! akarrerreyenheng-arey. Ngap ingwer-lkwer-anem anem. ⁷ Ntwarl alakenh arem, ntwap iterl-areyew, Akngeyan ngkweng-itwel arrer-anem anayntem. Ilkelhentyel ntwa ilek-ilek mpwaraynteyew.” ...

⁹ Saul-arl anperl-alhew, anamerl-antey Akngeyel renh ingwer-lkwerelaw. Ikwerel-antey ra angka INGKART-wenh ilew, artwamparl angkew-angkwarr. ...

¹⁷ Samuel yangkelhew Israel-wenh-rnemew, “Ingkerr akarrerreyew apmer Mizpah-itwew.” ...

²⁴ Rernem akarrerrew apmer ikwer-warl. Samuel-el Saul-anem arrwekel rnkernew. Samuel angkew ingkerrew, “Artwa nhenh arenh-arey! INGKARTel renh rlwanew, atyetyart aneyew! Ingwerenty alakenh aney-angenh rapeny, arrangkw!”

Akgerr inkwerelhemel arlkerrew ikwer, “Intem-antey ra aneyew atyetyart!” ...

11

Saul-el akgerr arntarnt-areyel apmer Jabesh-itwew

¹ Ikwer-penh atyetyart ilkwa apmer Ammon-areny apetyew itnan Nahash, artwa ahawarr akgerr-akert. Rernemap amperelew apmer Jabesh renh Gilead-ampeny-itwew. Akgerr ikwer-itwew nthakenh alhey-angenh aketh-warl anew. Rernem angkakert thwenew atyetyart ikwer-warl, alakenh angkeyew, “Ipmew anenhantherrenh atwey-angenh! Ngan atyetyart anewantherr anem. Anantherran warrkenharl ngkweng anem. Pip-warl anantherr alakenh

ingkerrenhel ingkwerney, itnernem ingkwernelheyew ingkerrenh pip ikwer-warl.”

² Atyetyartel thweneynew angkakert angkep, alakenh angkeyew, “Kel. Atha arrenhantherrenh atwey-angenh. Anngant arraty-ampeny atha tyerrem arrewantherr-itwew. Alakenharlan Israel-wenh-rnem nyerr-antheyew.”

³ Artwamp-rnem apmer ikwer-areny-rnemel angkakert thwewew angkep atyetyart ikwer-warl, alakenh angkeyew, “Alerl anantherraney arlta 7-ew-atety-tangkwel. Kel anantherrthwenem angkakert-rnem apmer arrpanenharl Israel-ampeny-warl. Ingwer-rnem apetyeyangenh apek, anenhantherrenh alpemeleyew. Arrangkwelelan, anantherr ngkweng-warl anthelhem. Ntwap anenhantherrenh annga tyerrem-anem.”

⁴ Angkakert-rnem aremerrew apmer Saulwenh-itwew Gibeah-itwew, angka apmwakert. Apmer ikwer-areny-rnemel awew, rernemap atayel artnalhelerrenh. ⁵ Saul-an apal warrkerrenh katen-itwew. Rarl apeyalpenh pwelek atherr-akert, rap awew artnalhelerrenharl. Rap ayernew, “Nthakenh irreyelay? Ilekew akngerr artnalhelerreyel?” Rernem renh ilew, angkakert-rnemelarl ilew-angkwarr.

⁶ Saul-el awew, Inweng Akngey-wenhel renh rlterrkelew anamerl-antey arawerrng ilkwel. Ra ahelerrew artewenty atyetyart Ammonareny ikwer. ⁷ Pwelek ikwerenh-atherr ipmew atwew, nayp ilkwel akep-akalthemel akelyakely. Angkakert akngerr-tangkwel akarrelew,

aker akely-akely anthemel ikwer-rnem. Rap apmer arrpanenh-warl Israel-ampeny-warl thwenew, angkey-alheyew alakenh, "Aker tyeylp nhenh arenh-arey! Artwa ingkerrenhel apenteyew Saul-then Samuel-then, Ammon-areny-rnem-then werreyew! Artwa anyent arteny anenty, Saul-elap pwelek ikwerenh-anem akep-akaltheyenh aker nhenh-apeny!" Alakenhan Saul-el akgerr ater-anthew, INGKARTelarl rlterrkelewel. Rernemap ikwer anyent-inger awelhew. ⁸ Saul-el akarrew artwa akgerr apmer anyent-itwew Bezek-itwew; 300,000 Israel-areny, 30,000 Judah-areny-rnem.

⁹ Saul-rnemel ilanthew angkakert Jabesh-areny-rnem, "Jabesh-areny-rnem ilenh-arey, 'Ingwelarrengan ingwepenh-antey anantherr irrentemel atweyenh Ammon-areny-rnem!'"

Jabesh-areny-rnemel awew, rernemap irrngerney irrew. ¹⁰ Rernemap angkakert thweneynew angkep atyetyart Ammon-areny-warl, alakenh iley-alheyew irrtwyerremel irrtwyerl-ampernemel, "Ingwelarreng anantherr anhelhem ngkweng-warl mentyanem. Ntwarrp anem, pwarrk antha, ngarl angkew-angkwarr."

¹¹ Saul-el ikwerenh-rnem irrpety-inger akalkelh-ayntew ingkeny tyerrelhey-angenhel-antey, 110,000 ingkerr amentew-ament, 330,000-penh. Aherlkewarrel-anem rernem anterrerrew apmer Ammon-areny-rnem-wenh-warl, artwa akgerr ipmew atwew. Rernemap renh-rnem atwenh-antey ingkeny ampepew-atety. Irrpetyapant-anem Ammon-areny-rnem

aneyelpew, rernemap anterrerrew ingweram-
angkwarr. ...

15

Saul awelhey-angenh INGKARTew

¹ Ingwer-ingweran artwamp Samuel angkew Saul-ew, "INGKARTel ayenh ilew, ngenh atyetyart arrerneyew ikwerenh-rnemew Israel-wenh-rnemew. Awelha angka nhenhew-anem, rarl ayenh ilew ngwamp. ² 'Awank-akerr, Israel-wenh-rnemarl alperlewenh Egypt-they, Amalek-areny-rnem apetyew, renh-rnem atweyew. Aleyan athanemarl renh-rnem atweyew, rernemarl alakenh-anyem apmwa mpwarew atyenh-rnemew. ³ Amalek-areny-rnem atweyew alhenh-arey! Arrtyemel ilek-ilek ikwer-rnem-wenh! Ingkerrenh atweyew ywerrelhelemel; artwernem, arelh-rnem, ampernem, pwelek-rnem, yep-yep-rnem, kamwerl-rnem, tangkey-rnem-akerr ingkerr-antey! Atyeng ingkerrenh antheyew alakenh.' "

⁴ Saul-el angka thwenew apmer arrpanenh-warl, artwa ahawarr-rnem akarrerreyew apmer anyentel Telaim-el. Akngerr akarrerrew apmer ikwer-itwew; 200,000 Israel-areny-rnem, 10,000 Judah-areny-rnem. ⁵ Ra renh-rnem atnwenhew apmer Amalek-areny-rnem-wenh-warl, rernemap irrtiyert-aylpew atwaty-itwew, apmer ikwer-itwew arrer-antey. ⁶ Ikwereng-arey ingwer-rnem-then anenh apmer ikwerel, Ken-areny-rnem. Saul-el angkakert ikwer-rnem

thwewnew, alakenh angkeyew, “Arrantherr Ken-areny-rnem alhemer-tangkwel arrangerremel, atha ingkerr ilwerl-atheneyenh-wety Amalek-areny-rnem. Nthakenh atha arrenhantherrenh atwey-angenh, arrantherrarl Israel-wenh-rnem alpemelew, arrwekeleny-rnem awankakerrarl alperlewenh Egypt-they.” Ken-areny-rnem alhew-tangkwel apmer ikwer-they arrangerremel.

⁷ Saul-el artwa ikwerenh-rnem-akertel alwewnew Amalek-areny-rnem apmer Havilah-they apmer Shur-ew-atety, akngerrakw-ampeny Egypt-they. ⁸ Saul-wenh-rnemel ipmew atwew artwa, arelh, ampa ingkerrenh-antey. Atyetyart Amalek-arenyan itnan Agag rernem atwey-angenh, arrangkwarl. ⁹ Itetharl renh atnyewnew. Atnwenh mwerr-rnem-then iteth atnyewnew; yep-yep, pwelek, akwerrk-rnem-then ikwer-rnem-wenh. Atnwenh apmwernemant rernem ipmew atwew. Ingkerrenh ipmew atwey-angenh-antey, arrangkw. Rernem awelhey-angenh, INGKARTelarl Saul ilew-angkwarr.

¹⁰ Ikwerel-antey INGKARTel artwamp Samuel ilew, ¹¹ “Saul-an atyeng awelhey-angenh. Intwemelerrew atyeng-wety. Ayengan amperrngerreyel, atharl renh atyetyart arrernew.” Samuel-el awew, rap arlka apmwerrew. Ankwakel ra artnemel angkew INGKARTew.

¹² Ingwepenh-antey Samuel akwentew, alhew-anem, Saul-ew nthweyew. Ingwerentyel renh iley-ayntew, “Arrangkw nhenh. Saul ra alhew

apwert Carmel-warl. Apwert ikwer-itwew apwert arlpenty-anem ra rnkernew, ingkerrel iterl-araynteyew, rantarl Amalek-areny-rnem ywer-relhelemel atwew. Ikwer-penh ra alhew apmer Gilgal-warl-anem.”

¹³ Samuel-elarl renh arey-alhew, Saul angkew, “Samuel-ay! INGKARTel ngenh irrngerney-anthemer! Atha kel-antey mpwarew, rarl ilanthew-angkwarr!”

¹⁴ Samuel angkew, “Ntwa ilek-ilek ingkerr ywerrelhelemel atwey-angenh! Aleyan atha aweyel, yep-yep-rnem pwelek-rnem-then artneyelar!”

¹⁵ Saul-el tyernew, “Artwa ahawarr-rnemel, rernemarl alakenhan mpwarew! Rernem atnwenth mwerr-rnem inew Amalek-areny-rnemwenh. Iteth-antey rernem atnyenew, ntwaw arrtyaynteyew INGKARTew. Ingwer-rneman anantherr ipmewarl atwew.”

¹⁶ Samuel-el renh akeleytelew. “Akeleyt awelha atyeng-tangkwel! Atha ngenh ileyew, INGKARTarl atyeng angkew-angkwarr ingwel.”

“Ya, ila ayenh.”

¹⁷ “Akely-tangkwel nga ilelhew. Nga ilkwa aneyew arrkernelhey-angenh. INGKARTel ngenh ilkwarl arrernew, ikwerenh-rnemew atyetyart anaynteyew. ¹⁸ Ra ngenh ilanthew, atweyew apmwa yanh-rnem Amalek-areny-rnem. Ngenh ilanthew, renh-rnem ywerrelhelemel atweyew ingkerrenh-antey. ¹⁹ Ilekew nga awelhey-angenh ikwer? Ilekew

ntwa apmwa mpwarew INGKART-wenh-angkwarr? Ra ngkweng ahelerrew, ntwarl inew ilek-ilek ikwer-rnem-wenh.”

²⁰ Saul-el apatemel tyernew, “Ay? Innga ayeng awelhew INGKARTew! Atha mpwarew, rarl ayenh ilanthew-angkwarr! Atha atwew ingkerr; artwa, arelh, ampethen. Atyetyart Agagthen atha akngey-alpew iteth-antey. ²¹ Artwa ahawarr-rnemel, rernem inew atnwenth mwerr-rnemant ikwer-rnem-wenh! Yep-yep-then pwelek-rnem-then rernem akngey-alpew, ntwaw arrtyeyew INGKARTew apmer nhenh-itwew Gilgal-itwew.”

²² Samuel angkew, “INGKART ilkelhem, angka ikwerenhew-tangkwel awelh-aynteyew. Aker pwelhew ra ilkelhem alyepant. Anter pwelhew ra ilkelhem alyepant. Ikwerarl awelhemewant ra inkwerelhem. ²³ Ntwa iterl-aremer, ingwerenty awelhey-angenh INGKARTew, rap apmwa inngarl mpwarem. Apmwarlap alakenhan, inweng apmwa ayernenty-apeny. Ingwerenty tangkemel anenty, INGKARTan ikwer inkwerelhey-angenh. Apmwarlap alakenhan, ampwal-rnemewarl kwernerreyel-apenyarl arwerl-penhew apwert-penhew. Nga awelhey-angenh angka INGKART-wenhew, rap ngkweng-wety intwemelerrew arrpemar. Nga atyetyart apmwanem irrew Israel-wenh-rnemew! Ngarl apmwelhelew-wety, INGKARTel ilew, ‘Nthakenh nga atyetyart aney-angenh-anem, arrangkw.’ ”

²⁴ Saul angkew, “Ayeng-antey apmwelhelew. Awelhey-angenh INGKARTew ngkweng-then. Ayeng atererrew artwa ahawarr-rnem-wety,

ikwer-rnemewant awelhew. ²⁵ Athan ngenh ayernem, ahelerrey-angenh atyeng. Alpey-angenh atyeng-wety. Apey-alpa atyeng-itwel atyenh-rnem-warl. Ayeng INGKARTewant kwenerremel angkaynteyew.”

²⁶ Samuel-anap alakenharl ikwer angkew, “Ngan awelhey-angenh INGKARTew. Nthakenh ayeng alpey-angenh ngkweng-itwel. Ngan awelhey-angenh INGKARTew, rap ngkweng awelhey-angenh arrpemarl. Nga atyetyart apmwanem irrew! Ngarl apmwelhelew-wety, INGKARTel ilew, ‘Nthakenh nga atyetyart aney-angenh-anem, arrangkw.’ ” ...

16

Samuel-el David-anem arrerneyel arrwekel-antey atyetyart Israel-wenh-rnemew

¹ Ingwer-ingweran INGKART angkew Samuel-ew, “Samuel-ay! Saul ra atyetyart apmwanem. Athan renh alpemeley-angenh-anem. Ilekew nga amperrngerreyel ikwer? Pweterl anter alipakert ina. Alhanem, artwamp Jesse areyew apmer Bethlehem-itwew. Alerikw anyent ikwerenh atha rlwanew, atyetyart aneyew, menty-anemar Saul-an.”

² Samuel-an angkew, “Nthakenh atha alakenh arnwarney-angenh! Ingwerentyel Saul ilewerr, ra ayenh ipmew atwewerr!”

INGKARTan angkew, “Kapey-kapey akngeyna. Alakenh angkey-alha Bethlehem-areny-rnemew, ‘Atha arrtyemel antheyew kapey-kapey nhenh INGKART-warl.’ ³ Artwamp Jesse ila, ra

alerikw ikwerenh-rnem-akert apetyeyew, aker arlkweyew. Athap ngkweng ilem, artwa nthek-apeny atha rlwanewan, ntwaw theleyew anter alip ikwer-warl akapwert-warl. Alakenh-anyem atha renh rlwaneyew atyetyart arrwekel-antey.”

⁴ Samuel awelhew, INGKARTarl angkew-angkwarr, rap anperl-alhew-anem Bethlehem-warl. Ra aremerrey-alhew apmer ikwer-itwew, artwamp-rnem arnekerrey-ayntew ikwer, arrewemel atererremel. Rernemap ayerney-ayntew, “Nga apetyew, angka mwerr-angker ileyew? Arrangkw apek?”

⁵ Samuel-el tyernew, “Ya, ayeng inkwerelhemel apetyew, kapey-kapey nhenh arrtyemel antheyew INGKARTew arrewantherr-itwel. Arrewantherrenh-rnem ilenh-arey arnwarnelheyew, anantherraw kapey-kapey ingkerrenhel arrtyeyew INGKARTew.” Artwamp renh Jesse ra ilew arrpemarl alerikw ikwerenh-rnem-then. Rap renh-rnem alpemelew arnwarnelheyew.

⁶ Ingkerrarl akarrerrew, Samuel-el arew alerikw alkenh Jesse-wenh, itnan Eliab. Rap iterrew, “Nhaym apekarl ran, INGKARTelarl rlwanewan.”

⁷ INGKARTan angkew Samuel-ew, “Nhenh-weny. Atha yanh rlwaney-angenh. Ya, atha iterl-areyel, ran arlpenty rlterrkarl. Kel artwernem arrantherr alakenh iterrem. Atyenh-angkwarran alakenharl; atha renh kanper iterl-areyel.”

⁸ Samuel-el Jesse ayernew, alerikw ingwer-anem ikwerenh thweneyew Abinadab. Rap

apetyew. Samuel-an angkew, “INGKARTEl nhenh rlwaney-angenh.”⁹ Jesse-el thwew new Shammah-anem. Samuel angkew, “Ar-rangkw. INKARTEl yanhan rlwaney-angenh arrpemar.”¹⁰ Jesse-el 7 ingkerrenh anyentarl-anyentarl rnerneynew Samuel-angkwarr. Rap angkew, “INGKARTEl rlwaney-angenharl nhenh-rneman.”¹¹ Samuel-elap ayernew, “Alerengkw ingwer apek ngkwenh aneyel?”

Rap tyernew, “Ya. Alerey akely David-anem, ranap peleyn-itwew yep-yep-rnem arntarnt-areyel.”

Samuel angkew, “Ingwerenty thwena, renh ingwerleweyew. Anantherrap ikwer-tangkwel mp-welhem. Nthakenh arlkwey-angenh amentel.”

¹² Jesse-el thwewew ingwerenty, David ingweyew. Renhap ingwerl-alpew, ranap artwa mwerr-angker akely. INKART angkew Samuel-warl, “Nhanyemart ran! Rtnerl-alhanem! Anter alip thelanem akapwert-warl!”

¹³ Rap inew anter alip pweterl-akert, thelemel David-warl akapwert-warl. Awayikw ikwerenh-rnemelan arenh. Arlta ikwer-penhan David rlterrk-anem anew Inweng INKART-wenh-akert. Samuel ra alpew-anem apmer ikwerenh-warl Ramah-warl.

David-an Saul-ew warrkerreyel

¹⁴ Inweng INKART-wenh alpew-anem atyetyart Saul-they. INKARTelan inweng apmwanem thwewew, Saul renh alhengkerr-antheyew.

15 Warrkenh ikwrenh-rnem angkew ikwer, “Atyetyartay! Anantherr areyel, INGKARTELarl inweng apmwa ngkweng-warl thwenew, ngenh alhengkerr-antheyew. 16 Anantherr alhem, artwa ingwerenty ingweyew, ampwal weth-lkwer ketay-apeny pelayerreyew ngkweng. Inweng apmwel ngenh alhengkerr-anthem, ra ampwal ngkweng pelayerrem, ngap mwerr-anemarl awelhem.”

17 Saul angkew ikwer-rnem, “Ya, artwa mwerrew nthweyew alhenh-arey, ampwal mwerrey pelayerrey-angkerew, akngetyemel atyengwarl.”

18 Warrkenh anyent angkew, “Atha iterl-areyel artwamp anyent Bethlehem-areny itnan Jessearl. Alerikw anyentan ikwrenh akaltyarl, ranap artwa mwerr-angker akelyarl. Ra anaynt angkem, ranap ater-weny arnkatyarl. INGKART arrer innga anem ikwer-itwel.”

19 Saul-el angkakert thwenew Jesse-warl, alakenh angkeyew, “Atyetyart Saul ra ilkelheyel, ntwaw alerengkw David yep-yepew-artey thweneyew ikwer-warl.”

20 Jesse-elan tangkey inew, rap amern akngerrywenew ngkwarl-then, arranty nanikwet yenpenh-akert. Rap alerikw ikwrenh ilew, alheyew apmer Saul-wenh-warl, tangkey-then nanikwet akely-then akngemel.

21 David rap warrkerrenh Saul-ew-anem. Saul-an ikwer ilkelhew artewenty. Rap renh ilanthew, irrtiyart-then alkwert-then ikwer katy akngaynteyew, Israel-wenh-rnemarl werrenh

ingwer-rnem-then. ²² Saul-el thwenew angkaker Jesse-warl arrpemar, alakenh angkeyew, "Saul David-ew ilkelheyel artewenty. Menty anaynteyew, ikwer warrkerr-aynteyew."

²³ Akgerr-inger INGKARTel thwenew inweng apmwa, Saul alhengkerr-anthaynteyew. David pelayerrerl-aynenh ampwal ikwerenh, inweng apmwa irrentenh. Saul ra mwerr-anem awelhenh.

17

David-el artwa arlpenty Goliath atweyel ipmew amentel-antey

¹ Ingwer-ingweran Philistia-areny-rnem akarrerrew apmer Socoh-itwew Judah-ampeny-itwew, werreyew Israel-wenh-rnem-then. Rernem ayntey-alhew apmer ingwer-itwew, Socoh arrerenty.

² Saul-el Israel-wenh-rnem akarrew, rernemap ayntew peleyn-itwew apmer Ila-itwew. Ikwer-itwew rernem arnwarnelherrew, atwerreyew Philistia-areny-rnem-then.

³ Apwert anyent arrer-antey arrpemar aynten. Rernemap peleyn-the they alpew apwert ikwer-war. Ikwer-the they rernem arew, ingwer-rnemelan renh-rnem arntarnt-arenh apwert ingwer-ampeny-the yar.

⁴ Artwa ahawarr anyent Philistia-areny itna Goliath anenh, ranap apmer Gath-areny. Artwa arlpenty ilkwa inngarlap ran. ⁵⁻⁶ Aheng-areyan ra aylpenh ampwalele ilek-ilek-war, arlka ilpelheyew-arelh. Ampwal-rneman awerr innga, ayen-penh arnwarnew. Ingwerelan

akapwertarl ilpelhenh, ingwer-atherran arlaw aylpeyew-arelharl. Arnelt yarl ingwerelan ilpelhenh, ranap awerr inngarl. Ra irrt yart atherr akngenh, akarteng-then arlpenty-then. Irrt yart akartengan ayen-penh arrpemarl, rap piltel antwerrkerl-apenh arety-angkwarr. ⁷ Irrt yart arlpentyan arrwekel-ampeny arrey lparl ayen-penharl. Ranap awerr innga arrpemarl. Artwa ahawarr ingweran alhenh arrwekel, alkwertarl ikwer katy akngenh.

⁸ Arlta arrpanenhel ra alhenh ampep-warl, arlkey-alhenh atayel Israel-wenh-rnemew alakenh, "Israel-wenh-rnemay! Ilekew arrantherr mpwelheyl? Arrantherr ahawarr-arrpantey! Ayenh arenh-arey! Ayengan ahawarr inngarl Philistia-areny! Arrantherran arwa Saul-wenh warrkenh-rnem! Artwa anyent-anem riwanen-arey thwenemel, aylanthaw atwerreyew! ⁹ Ra ayenh ipmew atwenty, anantherr ingkerrenh alpem Israel-warl, arrewantherr warrkerrey-alpeyew. Atha renh ipmew atwenty, arrantherr Philistia-warl alpem, anewantherrarl warrkerrey-alpem. ¹⁰ Arrwekel-antey arlka alpwyerrey-angenh! Thwenen-arey artwa anyent atyeng-warl, aylanthaw atwerreyew!" ¹¹ Saul-el Israel-wenh-rnemel-then awew, rernemap atererremel apateyelpew.

...

¹⁵⁻¹⁶ Arlta arrpanenhel ingwepenh atwerrp artwa arlpenty ra angkey-ayntenh alakenh arlta 40-ew-atety.

David-an alperl-arrernenh Saul-wenh apmerthey aynikw-wenh apmer-warl, yep-yep-rnem

arntarnt-araynteyew aynewikw-wenh-then.

¹⁷ Ingwer-ingweran aynikw ikwerenh angkew, “Yakweth nhenh ina ntang ampeng-akert, rtamp-rnem 10-anem. Aknga awayewengkw-rnem. ¹⁸ Aker cheese-rnem 10 aknga, anthemel atyetyart ahawarr-rnemew. Anamerl! Ayeng artewenty iterremel amperrngerreyel awayewengkw-rnemew. Angka akngey-alpa ikwer-rnem-wenh. Atha iterl-areyew, rernem mwerr-antey aneyel. ¹⁹ Alha apmer peleyn-warl Elah-warl. Anewantherrenh-rnem-then Saul-akerr werreyel Philistia-areny-rnem-then peleyn ikwer-itwew.”

²⁰ David awelhew aynewikw. Rap artwa ingwer-tangkwel arrernerl-alhew, yep-yep-rnem arntarnt-araynteyew. Ingwepenh ingwerelan ra ampwal-rnem tywenerl-alhew tangkey-warl, rap anpenhew-anem. Rarl aremerrey-alhew peleyn ikwer-itwew, rap arey-alhew, artwa ahawarr-rnem mpwelhenh, werreyew-anem. Rernem arikalhellerrenh arnkatyelhelemel.

²¹ Israel-wenh-rnem-then Philistia-areny-rnem-then rernem rtnemel arerrenh. ²² David-el anthenhew ampwal-rnem artwa amernarl arntarnt-arenhew. Rap anterrew, ahawarr-rnemaarl rtnenh-warl, awayikw ikwerenh-rnem areyew. ²³ Rap angkey-alhew ikwer-rnemel-arleng. Artwa arlpenty Goliath ra alhew ampep-warl apmelerr-angkwarr, atayel angkerl-apenh. David-el renh awew, alakenharl angkenh.

²⁴ Israel-wenh-rnemelan renh arew, rernemap anterrew aterel ikwer-wety.

²⁵ Rernem arrwekel-antey alakenh angker-

renh, “Arlta arrpanenh ra apetyeyel, kwanth-aynteyew arrkentalhelemel anenhantherrenh. Artwa anyentel anewantherrenhel renh ipmew atwenty, Saul-el renh apwert akngerr anthem, kwey alerikw-then ikwerenh anthemel. Artwa apwert akarreley-angker-rnemel nthakenh ikwerenh-rnem iley-angenh-anem, Atyet-yart Saul-ew apwert antheyew.”

²⁶ David angkew artwernemew, arrerarl ikwer-angkwarr rtnenh-rnemew, “Artwa yanhel anenhantherrenh nyerrel-antheyel. Ingwerentyel renh akeleytelemer. Ilekarl Saul-el anthem, ra artwa renh ipmew atwentyewan? Nthakenh ra arrkentalheley-angenh artwa ahawarr INGKART-wenh-rnem, Akngey inngewenh-rnem, arrangkw!”

²⁷ Rernem renh ilew, rernemarl angkerrew-angkwarr arrwekel-antey.

²⁸ David-wenh awayikw alkenh Eliab ra awew, rap ahelerrew ikwer. “Ilekewarl ngaw apetyew? Yep-yep irrpetyap akely weth-rnem-alew? Angwenhel renh-rnem arntarnt-areyel aleyan? Ngan apmwelheleyel! Ilekew nga arrk-ernelheyel ilkwarrpantey? Nga arrkent apetyew arwa, araynteyew werreyelar!”

²⁹ David-el ayernew, “Ilekew ntwā ayenhan ilteyel? Ikel ayengan apmwelhelew? Arwarl athan ayerneyel!” ³⁰ Rap artwa ingwer-anem ayernew, “Ilekarl Saul-el anthem, ra Goliath renh ipmew atwenty?” Artwa ra ilew, rernemarl arrwekel-antey angkerrenh-angkwarr. ³¹ Ingwerenty alhew-anem, Saul

renh ileyew, David-arl angkew-angkwarr. Saul-el artwa anyent-anem thwenew, David ingweyew.

³² David angkew ikwer, “Atyetyartay! Nthakenh anantherr atererremel aney-angenh artwa yanh-wety! Ayeng alhem. Atha renh amentel-antey atweyew.”

³³ Saul-elan tyernew, “Arrangkwarl! Nthakenh ntwā renh atwey-angenh! Ngan artwa akel-yarl, ran ahawarr arnkatyarl, akelyank anew ahawarr.”

³⁴ David-an angkew, “Yep-yep aynaty-wenh-rnem atha arntarnt-arem. Layenel yep-yep anyent apek antwerrkem, iytarr-akngemel arlkweyew, payel apek. ³⁵ Atnwenth ahelengkw atha alwernem atwemel, yep-yep tyarleweyew-atety. Ra atyeng arrkernelhem thnweyew, alherremel. Atha renh antwerrkem altethey, atwemel ipmew. ³⁶ Akgerr-inger atha atwew layen-then pay-then. Athap ahelengkw yanh Philistia-areny atwem irrkaty-angkwarr, rarl nyerrel-antheyel ahawarr Akngey-wenh-rnem. Akngey rant anyent alkenh aneyel. ³⁷ INGKARTEL ayenh arntarnt-arew atnwenth ahelengkw-rnem-wety, rap ayenh arntarnt-arem arrpemarl artwa ahelengkw yanh-wety.”

Saul-an angkew ikwer, “Kel. Alha, atwerreyew mpwelanth, INGKARTEL ngenh arntarnt-aremarl.”

³⁸ Aheng-areyan Saul aylpenh ampwalel ilek-ilek-warl, arlka ilpelheyew-arelh. Ampwalrneman awerr innga, ayen-penh arnwarnew,

rap anthew David-ew, raw aylpeyew. Rap ampwal ikwer anthew, ayen-penh arrpemar, akapwert ilpelheyew-arelh-then. ³⁹ David aylpewanem, rap piltel arertnelhew, napp arlpenty Saul-wenh arrernemel. Ngwampant ra ampwal awerr yanh-lkwerelan aylpew, renhap alhey-angenhew.

Rap angkew Saul-ew, "Nthakenh ayeng alhey-angenh alakenh. Ayengan nhelkwer-warl aylpey-angenh." Rap lhelew, ⁴⁰ irrertety ikw-erenh inew ampwal tyangay-apeny yenp-penh-then, anpenhew-anem. Iipay-itwew ra akwe-tyew apwert alyelk-rnem 5, yakweth-warl akw-ernemel. Rap alhew artwa Philistia-areny ikwer-warl-anem.

⁴¹ Goliath alhew arrpemar ikwer-warl. Ahawarr ingwerelan alkwertarl katy akngeynenh arrwekel. Ratherrap David-an arrerelhew. ⁴² Artwa arlpenty ilkwel atherremel David arrkentalhelew, "Ngan artwa akelyar! ⁴³⁻⁴⁴ Ilekew nga arwerl-akertan apetyeyel? Arengkang ayengan ngkweng? Kel apetya! Atha ngenh ipmew atweyew, thipel-then atnwenth ahelengkw-rnemel-then ngenh arlkweyew! Atha ngenh ilwerl-athenem!" Rap altyerr ikwerenhrnem ayernenh, David atweyew.

⁴⁵ David-el tyernew, "Nga apetyeyel, ayenh atweyew napp arlpenty-akert, irrtiyart atherranem. Ayenganap alhem ngkweng-warl, ngenh atweyew, INGKART Atyetyart Ilkwa Ingkerrenhel rarl ayenh thwenew. Rant rlterrk anyent aneyel. Renhant ahawarr Israel-wenh-rnemel apentemar. Ntwanap

renh arrkentalhelewarl. ⁴⁶ Rlengkanap ayenh
 alpemelem INGKARTel, ngenh atweyew. Athap
 ngenh athenemel atweyenh, ahenty-then
 akerrth-arternemel. Rlengkan arrantherr
 Philistia-areny-rnem ipma aynteyenh, thipel-
 then atnwenth ahelengkw-rnemel-then
 arrenhantherrenh arlkweyenh! Alakenh
 ingkerrel iterl-areyew, Akngey Israel-areny
 rant anyent inngan. ⁴⁷ Anantherr akngerr
 akarrerrewel iterl-areyew, INGKARTel
 ikwerenh-rnem arntarnt-arem ikwerenh-
 angkwarr. Nayp arlpenty-akert irrtyart-
 then-akert nthakenh renh alpemeley-angenh,
 arrangkw. Anantherran ikwerenh-rnem,
 ament-wenyarl, anantherrap arrenhantherrenh
 ywerrelheleyenh ingkerrenh!"

⁴⁸ Goliath retangkwel alhew, David atweyew.
 David-an anamerl-antey anterrew ikwer-warl,
⁴⁹ apwert-anem tyerrenhew yakweth ikwerenh-
 they. Tyangayel ra wew renh rlwantey, ngk-
 wernan iltewew akapwert-itwew. Goliath-an
 atnertel-ayeth aytnew ahern-warl, ayntey-
 alpew-anem.

⁵⁰ Alakenh David-el artwa Goliath renh ip-
 mew atwew. Nayp arlpentyel ra atwey-angenh,
 arrangkw. Ra apwert tyangay-akertel renh
 wew. ⁵¹ Rap anterrew ikwer-warl, rtney-alhew
 ikwer-itwew irrwerleng. Goliath-wenh pilt-
 they ra tyerreyelpew nayp arlpenty, ahenty-
 anem akerrth-atwew renh, arlkethen akapwert-
 then atherreyelpew. Philistia-areny-rnemel
 arew, ahawarr ilkwa ikwer-rnem-wenh aynterl-
 anenty, rernemap anterrerrew. ⁵² Israel-wenh-

rnemel renh-rnem ingkern-they alwernew, arlkemel atayel. Iwerr Shaaraim-angkwarr alwernew apmer Gath Ekron-then ikwer-atherrew-atety. Ipma akngerr aynteynenh iwerr ikwerel.
...

18

Saul-el David alharlkweyel

... ⁶ David-el artwa arlpenty Goliath ipmew atwew-penh, Israel-wenh-rnem ingkerr alperlewenh apmer-warl. Apmer arrpanenh-they arelh-rnem apetyew, renh-rnem rlwateyew, rntweyenenh aylelheyenenh inkwerelhemel. Ingwer-rnem teram akely pelayerrenh, ingwer-rneman ampwal ketay-apenyarl pelayerrenh. ⁷ Rernem alakenh aylelherl-apenh:

“Saul-el ahelengkw akngerr atwew,
David-elan ahelengkw akngerr inngarl atwew!”

⁸ Saul-el awew, rap ahelerrew artewenty innga. Ra iterrew alakenh, “Rernem angkeyel, David-elan ahelengkw akngerr inngarl atwew atyeng-angkwarr. Atyetyart apek renh ar-rerneyew arrkernelheyel.”

⁹ Ikwer-theyan rap alharlkwemel renh arntarnt-arenh intem-antey.

¹⁰ Arlta ingwerelan INGKARTel inweng apmwa arrpemarl thwenew Saul-warl. Ra artewentyel arwengkerrenh, warl kwenel anenh, arlkenty iwenh. David-an ampwal ketay-apeny ikwer pelayerrenh apmelerr-angkwarr. Saul-el ran irrtiyart atnyenenh itepel, ¹¹ rap iwew,

alakenh iterremel, “Arneltiy-angkwarr atha renh akwerterrp atantryew!” David-an arnangerrew anamerl-antey irrtiyart-wety. Atherr-inger ra renh atantryew-anew. Atherr-inger David anamerl-antey ikwer-wety arnangerrew. ...

19

Saul arrkernelheyel, David atweyew ipmew

¹ Ingwer-ingweran Saul-el alerikw ikwerenh Jonathan ilanthew warrkenh ikwerenh-rnemthen, “David ipmew atweyew!” Alerikwanap David-ew artewentyelarl ilkelhenh, ² rap David ilew, “Aynatyan arrkernelheyel, ngenh ipmew atweyew! Anterra, irrtiyert-aylpeyew katen-itwew! Arntarnt-arelha ingwelarreng ingwepenh. ³ Atha aynaty atnwenhey-alhem katen ikwer-warl, ngarl irrtiyert-aylpem-itwew. Ayengap angkemarl ikwer-warl ngkweng-they. Rarl alpem-penh, athap ngenh ilem, rarl angkew-angkwarr.”

⁴ Ingwepenh Jonathan aynikw ikwerenh-then rtnenh katen ikwer-itwew, David-ew angkerrenh. Jonathan-el ra David-akert mwerrarl ilenh alakenh, “Nthakenh ntwapa apmwa mpwarey-angenh ikwer. Ra apmwelheley-angenharl ngkweng. Ilek-ilek mwerr-angker mpwarew ngkweng, ngenh alpemelemel. ⁵ Ra artewenty iterrey-angenh, ipmew atwewerran, arrangkw. Rap arnkatyel artwa ilkwa Philistia-areny ipmew atwew. INGKARTel inngarl Israel-wenh-rnem

alpemelew ikwereng-arey. Ntwan arew arrpemar, ngap inkwerelhew. Ilekewarl nga iterrew, renh ipmew atweyewan?"

⁶ Saul awelhew alerikw ikwerenhew Jonathanew. "INGKART aweyel-wety, ayeng ngkweng arraty angkew. Ayeng arrkernelhey-angenh, David ipmew atweyew!"

⁷ Saul rarl alpew-wety, antengan Jonathan arlkew David-ew, tyerrelheyew. Rap renh ilew, aynikw ikwerenharl angkew-angkwarr. Rather-
rap Saul ikwer-warl-anem alhew. David ikwer warrkerrenh arrpemar angkep.

⁸ Ingwer-ingweran Philistia-areny-rnem apetyew arrpemar, atwerreyew Israel-wenh-rnem-then. David ran atyetyart ahawarr-anem anew, rap Philistia-areny akngerr atwew. Ingwer-rneman aterel anterrerrrew arleng.

⁹⁻¹⁰ David alpew apmer Saul-wenh warl-anem, ikwer warrkerreyew. Ingwer-ingweran Saul-warl INGKARTel inweng apmwa thwenew arpemar. David-an apmwal ketay-apeny pelayerrenh apmelerr-angkwarr. Saul-elan irrtiyart arrpemar atnyenenh itepel, rap iterrew, renh atantheyew arnelty-angkwarr akwerterrp-antey. Irrtyartel warlant atwew. David-an anterrew mwerr-antey ikwer-wety.

¹¹ Saul-el artwernem thwenew, warl David-wenh arntarnt-areyew ingwel, ingwepenh renh ipmew-anem atweyew. Akelty ikwerenhel Michal-el renh ilanthew, "Anamerl anterra ingwel-antey! Mpwelhey-angenh! Ingwepenh rernem ngenh ipmew atwey-ayntewerr!" ¹² Rap renh rwepel atwarrelhelew wintew-angkwarr,

rap mwerr-antey irrtiyert-anterrew. ... [*David-an anterrew artwamp Samuel-wenh apmer-warl Ramah-warl. Saul-el awew, rap alhew, nthweyew ikwer apmer ikwer-itwew.*] ...

20

Jonathan-el mpwernikw ikwerenh David alpemeleyel

¹ Ikwer-they David irrtiyert-anterrew apmer Naioth-they Ramah-ampeny-itwew. Ra alhew Jonathan-wenh apmer-warl, renh ayerneyew, “Nthakenh irrew ayeng? Ilek-el ayeng apmwel-helew? Ilek-wety aynelengkw ayenh ipmew atweyew nthweyel?”

² Jonathan-el tyernew, “Arrangkwarl! Nthakenh ngenh ipmew atwey-angenh! Aynelaty ayenh iley-angenh, ra ilkelhenty, ngenh atweyew. Ra ayenh ilem-tangkwel, rarl ilkelhem-angkwarran. Ikwerenh-angkwarran. Nthakenh ayenh irrtiyerremel iley-angenh. Apalarl nga angkeyel, inngeweny!”

³ David-el renh akeleytelew-anem. “Aynelengkw iterl-areyel, aylanthan arrerant-atherr mpwernenheng-atherr-anemarl. Ra alakenh iterrewerr, ‘Nthakenh alerey iley-angenh. Arlka ra apmwerrewerr!’ Awelha atyeng! Innga wenh! Rlengk-antey ayeng ilwem apek!”

⁴ Jonathan angkew, “Kel, ngarl iterreyel. Nthakenh irrem ayeng ngkweng aleyan?”

⁵ David angkew, “Ingwelarreng akngerran akarrerreyenh, INGKARTew angkaynteyew

inkwerelhemel alkent ingkayltel apmellerrel-ayeth. Akngerr akarrerreyenh apmer aynewengkw-wenh-itwew, kwenty arkwereyew. Ayenh-then ra ilew, ikwer-itwew arlkweyew. Ayeng ingwa atherrel irrtiyert-aneyew-tangkwel katen-itwew. Mwerrang alakenhan? ⁶ Aynelengkw atyeng ayernenty, ila renh alakenh: ‘David-el ayenh ayernew, “Mwerrang ayeng alheman apmer Bethlehem-warl? Aherrety arrpanenh atyenh-rnem akarrerrem arrpemarl apmelerr-angkwarr apmer ikwer-itwew, aker arrtiyewew INGKARTew.”’ ⁷ Aynengkw angkentyan, ‘Mwerr,’ kel mwerrarl. Ra ahelerrenty, ntwā iterl-ararl, ra iterreyel, ayenh ipmew atweyewarl.” ...

²⁴ David alhew-anem, irrtiyert-aylpeyew katen-itwew.

Arlta ingwerelan akngerr akarrerrew apmer Saul-wenh-itwew. Saul-an anenh, amern arlkwemel ²⁵ chair ikwerenhel irrkaty-angkwarr, alerikw-warl-athek. Atyetyart ahawarr itna Abner anenh arrpemarl Saul-awa. David-ant ywerrew. ²⁶ Saul-el arenh akeleytel, ingwerenty ayerney-angenh-antey. Rap iterrenh ament-antey, “David apekan arnwarnelhey-angenh-anteyarl, apetyeyew nhewarl. Ra apek ilek-ilek mpwarenh, nthakenh alhewer apetyey-angenh-antey.”

²⁷ Arlta ingwerelan Saul-el ikwer arew arrangkw-antey arrpemarl. Rap alerikw ikwerenhanem ayernew, “Ilek-wety David-an aneyel, apetyey-angenh? Apmwerrkelan ra

apetyey-angenh arrpemarl.”

²⁸ Alerelikw tyernew, irrtwyerremel alakenh ilemel, “David-el ayenh intem-antey ayernew, renh tyarleweyew, Bethlehem-warl alheyew.

²⁹ Ra angkew, ‘Aherrety arrpanenh atyenh-rnem akarrerrem apmer ikwer-itwew, aker artyeyew INGKARTew. Awayaty atyenh yangkelhew, ayeng alheyew ikwer-rnem-warl. Ngan mpwernaty atyenharl, ntwap ayenh tyarlewemer, alheyew awayaty atyenh-rnem areyew.’ Alakenh ra angkew, nthekwern apetyey-angenh, amern arlkweyew ngkweng-itwel.”

³⁰ Saul ra artewenty innga ahelerrew alerikw ikwerenhew, rap renh alakenh iltew, “Amengkw ngkwenh apmwa anenh, ngan rapeny arrpemar! Atha iterl-areyel, ngarl awelheyel Jesse-wenh alerikwew, atyeng awelhey-angenh! Nyerrelarl alakenhan, amengkw-then nyerrel-anthem ntwal! ³¹ David iteth-antey anenty, nthakenh nga atyetyart Israel-itwew aney-angenh. Rlengk-antey artwa thwena, renh ingwerl-alpeyew atyeng. Nthakenh ra iteth aney-angenh!”

³² Jonathan-el aynikw ikwerenh ayernew, “Ilek-penh ra ilwem? Ikel ra apmwelhelew?”

³³ Aynelikw awew, rap irrtiyart ikwer-warl iwew, ipmew renh-anem atantheyew. Alerikw ra anamerl-antey arnangerrew irrtiyart-wety. Rap iterl-arew-anem, aynikw ikwerenharl ilkelhew, David ipmew atweyew.

³⁴ Rap ahelerremel rtnerl-alhew, aketh-warl-anem tyerrelhenhew. Arlta ikwerelan ra amern

arkwey-angenh irrew, arkarl apmwerrew. Arlka alpweyerrew, aynikwarl ahelerrew David-ew artewenty.

³⁵ Ingwepenh ra alhew katen-warl, David-ew angkeyew. ...

⁴¹ ... David tyerrelhey-ayntew-anem apwert-rnem-they. Irrpety-inger kwenerrew ra Jonathan-warl-athek. Ratherr arrwantyerrew arreyll atherr-angkwarr Jew-rnem-wenh-angkwarr. Jonathan artnew ikwer, David ran artnew arrpemarl artewentyel. ⁴² Jonathan angkew, "Alpanem mwanty-antey. INGKARTel ngenh arntarnt-arem. Aylanthan mwerrant-atherr anem intem-antey. INGKARTel aweyel, aylantharl alakenh angkeyel. Rap alpemelem ngkwenh-rnem atyenh-rnem-then mwerrant-arey anaynteyew intem." David anperl-alhew-anem, Jonathan alpew arrpemarl apmer-warl.

21

Artwamp ingkart Ahimelech-el David alpemeleyel

¹ Ikwer-penh David alhew apmer Nob-warl, areyew artwamp ingkart itnan Ahimelech. Artwamp rarl renh arey-alhew, rap atererremel arrewew ikwer-wety. Rap renh ayernew, "Ilekew ngan apetyew amentan? Nthekarl artwa ahawarr ngkwenh-rneman? Ilek-penh ngan?"

² David-el tyernew irrtwyerremel, "Atyetyart Saul-el ayenh thwenew, irrtwertel-antey warrk ikwer mpwareyew. Nthakenh atha iley-angenh,

rarl ayenh ilanthew-angkwarr. Artwa ahawarr-neman atha ilew, arrwekel alheyew, apmer ingwer-itwew ayenh rlwateyew. ³ Amern apek ntwatnyenyeyel? Antha atyeng. Rtamp-rnem irpetyap apek? Amern ingwer-rnem apek antha.”

⁴ “Rtampewan ayeng arrangwarl. Amern weth-lkwer nhenhant tyenkerrew-arelh. Artwa ingkartelant arlkwey-angker. Nga artwa ngkwenh-rnem-then arelh-rnem-wety amenterrenty, mwerrarl atha anthem.”

⁵ David angkew, “Ya! Alakenh arrpemarlanantherr irrem, atyetyart ilkwewarl warrkerreyelelan. Anantherr kel-antey arelh-rnem-wety amenterrew.” ⁶ Rap renh amern tyenkerranthew, rtampew arrangkwel. Amern apmwer-rkeny ra anthew. Amern rlengkenyan ayntenh-antey taylor INGKART-wenh-itwew.

⁷ (Ikwereng-arey artwa warrkenh anyent Saul-wenh anenh arrpemarlitnan Doeg, apmer Edom-areny. Ra INGKARTew kwenerremel angkenh. Ranap yep-yepew-artey rltwarl, rap awenh, David-arl angkenh artwamp ingkartew.)

⁸ David angkew artwampew, “Arrangkw-anteyarl ayeng apetyew, ampwal-rnem iney-angenh-antey. Atyetyartel ayenh ilew, anamerlantey alheyew. Irrtyart apek ntwatnyenyeyel? Nayp arlpenty apek?”

⁹ Ra tyernew, “Ya, nayp arlpenty yanh artwa Philistia-areny-wenh Goliath-wenh. Ntwarenh ipmew atwew apmer peley nlla-itwew. Arrangkw-anem ingwer atnyenyey-angenh. Nga ilkelhentyelan aknga. Pantyelarl

artelheyel aynteyel, arnkwa artwa ingkart-wenh arrerenty.”

David-an angkew, “Mwerr-angkerarl yanhan ingwer-rnem-wenh-angkwarran! Antha atyeng.” ...

22

Saul-el ilantheyel, artwa ingkart-rnem atweyew ipmew

... ⁹ Artwa weth Edom-areny Doeg ra angkep alpew, Saul iley-alpew, “Atha David arew apmer Nob-itwew. Ran alhew artwa ingkart Ahimelech-warl Ahitub-wenh alerikw-warl. ¹⁰ Ahimelech ra ikwer INGKART ayernew, amern anthemel napp arlpenty-then Goliath-wenh Philistia-areny.”

¹¹ Saul-el awew, rap yangkelhew, Ahimelech ra apetyeyew ikwer-warl ikwerenh-rnem-akert. Rerneman artwa ingkart-rnem, apmer ikwer-itwew anenh. Rernem alhew ingkerr Saul-wenh apmer-warl, rarl angkwangkwarr. ¹² Rerneman aremerrey-alhew, ra angkey-ayntew Ahimelech-ew, “Alerikw Ahitub-wenhay! Awelha atyeng!”

Ra tyernew, “Ilek?”

¹³ Saul-el ayernew, “Ilekew ngan iterrew, ayenh alakenh irrtwyerl-amperneyew? Atyeng-wety rlungkan arlkarerreyel nga. Nga apek iterreyel, Jesse-wenh alerikw atyetyart ilkwa ar-rerneyew? Ntwa renh alpemelew amernel, napp arlpenty-then ntwan anthew renh. INGKART-then ntwan ayernew ikwer! Yanhan atyeng-wetyarl arlkarerrewarl. Rap ingwer-ingwer mpwelhem, ayenh ipmew atweyew!”

¹⁴ Artwamp ingkart angkew, “Arrangkw atyet-yartay! David inngarl ngkweng warrkerreyel! Artewenty warrkerreyel ingwer-rnem-apyeny-weny! Ra malyengkw ngkwenharl, atyet-yart ahawarr. Ingkerr apmer ngkwenh-itwew renh ilkelheyel artewenty. ¹⁵ Akgerr-inger atha INGKART ikwer ayernew apmelerr-angkwarr, ngap atyeng ahelerrey-angenharl! Nthakenh ntwā ayenh ayntarrp-iley-angenh atyenh-rnem-then, arrangkw! Anantherr iterl-arey-angenharl, aparl anenh!”

¹⁶ Saul-an angkew, “Nga ngkwenh-rnem-then ilwem rlengk-antey!” ¹⁷ Rap warrkenh ikwerenh-rnem ilanthew, “Artwa ingkart-rnem ingkerr atwenh-arey ipmew! Rernem awelheyel David-ew, atyeng awelhey-angenharl. Rernem iterl-arew, rarl atyeng-wety anterrenh, atyeng iley-angenh, arrangkw!” Warrkenh-rnemelanap nthakenh INGKART-wenh warrkenh-rnem atwey-angenh.

¹⁸ Saul angkew Doeg-ew, “Kelaw! Ntweteyaym artwa ingkart yanh-rnem ipmew atwa!” Doeg ra apmer ingwer-arenyarl, rap awelhow, Saul-earl renh ilanthew-angkwarr. Artwa ingkart-rnem 85 ra ipmew atwew. ¹⁹ Ikwer-they ra alhow apmer artwa ingkart-rnem-wenh-warl Nob-warl, rap ipmew arrpemarlingkerrenh atwew; ampa, arelh, pwelek, tangkey, yep-yep-rnem-then.

²⁰ Artwa anyentant mwerr-antey anterrew apmer ikwer-they itnan Abiathar. Aynikwan ikwerenh Ahimelech, arrengekwan ikwerenh Ahitub-arl. Ra alpew David-rnem-angkwarr. ...

24

David-el Saul nyerrel-antheyel

¹ Ingwer-ingweran Saul artwa ahawarr ikwerenh-rnem-akert alhew, rlwaterremel werreyew Philistia-areny-rnem-then. Rernemarl angkep alpewel, ingwerentyel renh alakenh ilew, “David-rneman apmer aterterr-ampeny-itwew aneyel En Gedi-itwew.” ² Rap akarreleynew artwa ahawarr akngerr apmer arrpanenh-they Israel-ampeny-itwew, 3,000. Rap anpenhew, nthweyew David-rnemew. Nthweyneh apwert-rnem-angkwarr, apmer itnan Nanikwet Akngerr.

³ Ikwer-itwew ra yard yep-yepew-arelh arey-alhew intey-ampenyew. Rap aylpenhew intey-warl-tangkwel iylweylperreyew. David-an artwa ikwerenh-rnem-akertarl arrwekel-antey irrtyert-aylpew intey ikwer-warl akert inngewarl. Intey ran ilkwa innga. Saul apalarl aylpenhew, renh-rnem arey-angenh. ⁴ Artwerneman areytenh David-warl, “Ntwa iterl-areyel, IN-GKART alakenh angkew, ‘Atha ngenh alpemele-marl, ngkweng-warl apmwa mpwarem-rnem atweyewarl. Ntwap mpwarem alhewer ikwer-rnem, nga ilkelhentyelan.’ Ya, ntwap renh ipmew atwemer!” Rap aperteynenh Saul-warl, arnkwanem akert akely ilterrenhew nayp ikwerenhel. Saul-an anenh-antey, away-angenh-antey.

⁵ Ikwer-penhan David artewenty-anem iterrew, rarl Saul-ew apmwelhelew-penh. ⁶ Ra arreytemel angkew, “Nthakenh atha apmwa mpwarey-angenh atyetyart atyenhew,

INGKARTelan renharl rlwanewarl, atyetyart ilkwa aneyew Israel-ew. Nthakenh atha renh arnep-arney-angenh, arrangkw.” ⁷ Alakenharl ra angkew, rap renh-rnem iltew, Saul atwewerr. Saul tyerrelhenhew intey-they aketh-warl-anem.

⁸ David-el renh alkwernew-tangkwel. Rane-marl tyerrelhenhew aketh-warl intey-they. Rap arlkew ikwer, “Atyetyartay!” Saul-el artepang areyelpew. David-an kwenerremel angkew, ⁹ “Akgerr ingwer-rnem ngkweng angkeyel, atha akwel apmwa mpwareyew ngkweng. Ilekw nga awelheyel ikwer-rnemewan?” ¹⁰ Ngwampan INGKARTel aylenhant pweytelew intey-itwew. Ingwerentyan angkew atyeng, ‘Ntwa atwemer ipmew renh!’ Ayenganap amperrngerrewarl ngkweng. ‘Arrangkw! Nthakenh atha atwey-angenh atyetyart atyenh. INGKARTel renh rlwanew, atyetyart aneyew Israel-ew!’ ¹¹ Malyeyay, nhenh ara! Arnkwa akert akely atha antwerrkeyel, atharl ngwamp akew! Atha ngenh ipmew atwey-angenh-antey, arrangkw! Ntwa iterl-aremer, ayeng ngkweng apmwelheley-angenh! Nthakenh ayeng atyetyart aneyew arrkernelhey-angenh ngkweng-angkwarr. Nganap atyeng nthweylarl intem, ayenh ipmew atweyew. ¹² Ingwer-ingweran INGKARTel court-emeleyen aylenhant. Ngkweng awakelheyen apek ra, ngarl atyeng-warl-athek apmwelhelew. Athanap nthakenh ngenh atwey-angenh, arrangkw. ¹³ Ntwa angka iterl-areyel, anantherrarl ilerrem. Anantherr alakenh ilem: ‘Akgerrrel nthakenh apmwa mpwarey-angenh. Apmwelant mpwarem alakenhan.’ Nthakenh

atha ngenh atwey-angenh.” ...

¹⁶ David-arl angkew-penh, Saul-el ayernew, “Malyey! Nganang innga angkeyel?” Rap artnew artewentyel. ¹⁷ “Arraty nga angkeyel. Ntwan mwerr atyeng mpwarew, ayengan ngkweng apmwelhelewarl. ¹⁸ Aleyan nga atyeng amperrngerrew. INGKARTel aylenhant pweytelew intey-itwew, ntw aayenh ipmew atwey-angenharl. ¹⁹ Artwa ahawarrelarl arey-alhem anyent ingwer, nthakenh ra tyarlewey-angenh renh. Alakenh-anyemarl anewantherrenh-angkwarran. Nganap alakenh-wenyarl. Ntw aayenh ipmew atwey-angenh. Alakenhan INGKARTel ngkweng-anem mwerr mpwarem. ²⁰ Atha iterl-areyel, ingwer-ingweran nga atyetyart Israel-itwew aneyenh. Ikwer-penhan ngkwenh-rnem-anem atyetyart aneyenh. ²¹ INGKARTelarl aweyel-wety, ilehantangkwel atyeng, ntw aayenh-rnem atwey-angenh-antey, ngarl atyetyart anemeng-areyan. Atyetyart nga anentyel, mwerr anaynta ikwer-rnem, rernem mwerr-anem anaynteyew, ingwer-rnem iyelpellerrey-angenh anewerr itna atyenhew.” ²² David-el renh ilew, rarl ayernew-angkwarr. Saul alpew apmer-warl-anem. David-an alpew arrpemarl ikwerenh-rnem-akert apwert-rnem-warl, irrtiyert anaynteyew.

25

David-el artwa Nabal-anem ipmew atweyew-anew

¹ Artwamp Samuel-an ahapperrew-anem. Israel-wenh-rnem akarrerrew, artnalhellerrenh.

Rernemap renh akwernew apmer ikwerenh-itwew Ramah-itwew.

Ikwer-penh David alpew artwa ikwerenh-rnem-akert apmer aterterr-ampeny-warl Maon-warl. ²⁻³ Artwa anyent apmer Maon-areny anenh itna Nabal, Caleb-wenh-antey. Apmer ikwerenhan apmer Carmel-ampeny-itwew. Ran apwert akngerr-akert, yep-yep-rnem 3,000, nanikwet-rnem 1,000. Artwa ahelengkwarlap ran. Akelty ikwerenh itnan Abigail. Ranap inngerr mwerr-angker, tyakarl anenh.

Ingwer-ingweran Nabal-el yep-yep alta akenh apmer ikwer-itwew. ⁴ David-el awew, apmer arlpawelarl anenhel. ⁵ Rap ilew artwa akely-rnem 10 alakenh, "Carmel-warl alhenh-arey, artwa Nabal areyew. Alakenh ikwer angkenh-arey, 'Atyetyart David mwerr-angkwarr angkeyel ngkweng! ⁶ INGKARTel ngenh arntarnt-arem ngwenh-rnem-then atnwenth-rnem-then! ⁷ Atha awew, ntwarl yep-yep-rnem altanem akeyel. Anantherran artwa yep-yepew-artey ngkwenh-rnem arntarnt-arenh mwanty, irrtiert-iney-angenh ikwer-rnem-they. Ahawarr ingwer-rneman irrtiert-awarr. Anantherran arntarnt-arem ingwer-rnem, irrtiertew iterrey-angenh. ⁸ Ayerna ngkwenh-rnem! Rernem ilem irrkaty-angkwarr. Alakenh anewantherr mwerr anemer nga, anantherrarl ngkweng warrkerreyel-apeny. Atha awew arrpemar, ntwarl ilew akngerr ngwamp, akarrerreyew amern kwenty arlkweyew. Anantherran angayakw aneyel. Amern-then aker-then apek ntwanthen?" "

⁹ Rernemap alhew apmer Nabal ikwerenh-warl, iley-alhew David-arl angkew-angkwarr. Ranap tyerney-angenh-anteyarl.

¹⁰ Rap renh-rnem ayernew, “Angwenharl David raw? Nthenh-apeny Jesse-wenh alerikwan? Ran warrkenh ingwer-rnem-apeny, atyetyart ikwer-rnem-wenh-wetyarl anterreyel.

¹¹ Warrkenh atyenh-rnemewant atha anthemamern aker-then kwaty-akerr. Nthakenh atha anthey-angenh arrewantherrant atyenh-rnem-wetyan. Atha arrenhantherrenh iterl-arey-angenh. David-el thweney-angenh apek arrenhantherrenh?”

¹² Rernemap alpew, David iley-alpeyew.

¹³ David angkew artwa ikwerenh-rnemew, “Nayp arlpenty-rnem inenh-arey! Mpa, alhey ikwer-warl!” Nayp arlpenty-rnem rernem arrernerl-alhew pilt-warl. David-el nayp arlpenty ikwerenh inerl-alhew arrpemar. Rap anpenhew artwernem 400-akert. 200 ingwer-rneman anenh, apmer arntarnt-araynteyew anteng.

¹⁴ Warrkenh anyent Nabal-wenh anterrew akelty Nabal-wenh-warl Abigail-warl, iley-alhew-anem, “David-el thwenew angkakert-rnem apmer ikwer-they, atyetyart anewantherrenhew angkeyew. Ranap apmwel-ayeth angkew ikwer-rnem. ¹⁵ Rerneman mwerr-angker anenh anewantherr, anantherrarl yep-yep-rnem arntarnt-arenheng-arey. Rernem irrtyert-iney-angenh anewantherr-they.

¹⁶ Iternew ingwel-then rernem arntarnt-arenh anenhantherrenh mwanty, yep-yep-

rnemarl akarrelenhan. ¹⁷ Atyetyart nhenh anewantherrenh irrwernelhew ament-antey. Apmwa innga ayntewerr anewantherr apmer nhenh-itwew. Nthakenh ntwā renh ilem? Ranap apmwarl, nthakenh ayeng ikwer angkey-angenh, arrangkwl!”

¹⁸ Abigail ra mpwelhey-angenh. Rap ilek-ilek akarrellew: rtamp-rnem 200, ngkwarl arranty nanikwet-wenh yep-penh-akert atherr, aker yep-yep ampeng-rnem 5, ntang ampeng yakweth-akert 5 arrpemarl, amern akngerr akatyerr-apeny, amern akngerr tywerrk-apeny. Rap tywewew tangkey-rnem-warl-anem.

¹⁹ Warrkenh ikwerenh-rnemew ra angkew, “Arrantherr arrwekel alhenh-arey. Ayengan ingkern-theyarl alhem.” Artwa ikwerenhew ra iley-angenh.

²⁰ Abigail anperl-alhew tangkey-akert, rap apwert atwatyel-antey alpenh. Rap David-anem areynenh, artwa ikwerenh-rnem-akertarl apetyenh.

²¹ David-arl alpenhel, ra iterrey-nenh alakenh, “Arrangkewewap atha arntarnt-arenhan artwa ikwerenh-rnem yep-yep-rnem-then apmer nhenh-ampeny-itwew. Mwerr ayeng anenh ikwer, ran atyeng apmwel-ayetharl angkew.

²² Atemwengkel-antey atha atweyenh artwa, awey-rnem ingkerr apmer ikwerenh-itwew. Atha alakenh mpwarey-angenhā, ayengap irrwernelhem Akngey-angkwarr!” Alakenh David iterrey-nenh.

²³ Abigail-elarl renh arenhew, rap atwarrenhew anamerl-antey tangkey-they, kwenerrew-anem ikwer. ²⁴ Rap angkew,

“Atyetyartay! Alerl-antey! Awelherl-ayna-tangkwel atyeng! Nga atyeng ahelerrem, mentyarl Nabal-an. ²⁵ Ikwer awelhey-angenh apmwa yanhew. Nabal-an itna arwengkarl, alakenh ra mpwarem apmelerr. Ayengan aney-angenharl, warrkenh ngkwenh-rnemar apetyeweng-areyan apmer anewantherrenh-warl.

²⁶ INGKARTel ngenh artwerelew, akngerr ipmew atwewerr. Ngap anewantherr ahelerrey-angenh-anem. INGKARTelan ingwer-rnem atwemer, rernemar apmwa mpwarem ngkweng, rarl Nabal arwengk atweyenh-apeny. ²⁷ Nhenh araw! Atha akngetyew amern ilek-ilek ngkweng, artwa ngkwenh-rnemel-then arlkweyew. ²⁸ Atha ngenh ayernem, ayenh ntwaw ipmeyew, artwa atyenhelarl apmwa ngkweng mpwarew-wety. Atha iterl-arem, ingwer-ingweran INGKARTel ngenh atyetyart ilkwa arrerneyenh Israel-ew. Ingwer-anem ngkwenh-antey atyetyart ilkwa aneyenh irrkaty-angkwarr. Ngarl apmer-ingwer-areny-rnem-then werrerrl-anem, ngap warrkerrem ikwer. Arraty-angkwarr-antey anaynteyew intem-antey nga ampwerreyew-atety. ²⁹ Aleyan ingwer-rnemel ngenh alwernem, ipmew atweyew. INGKARTelan ngenh arntarnt-arem mwanty, iteth-antey anaynteyew. Ngan impenarl ikwerenh. Ingwer-rneman ra rlengk-anteyarl ywerrelheleyen. ³⁰ Rarl mwerr ngkweng mpwarew-penh, ngap anem atyetyart ilkwa Israel-itwew, rarl arrwekel-antey angkw-angkwarr. ³¹ Ntwarl atweyew-anewelan, nga

nyerr-anemarl awelheyew-anew. Awethem ntwā atwey-angenh-antey anenhantherrenh. Ngarl atyetyart ilkwa aneyenhel, atyeng iylpellerrey-angenh-antey.” Abigail angkew arternpelemel David-ew alakenh.

³² David-an angkew, “INGKART atha nakem, Akngey Israel-areny! Rarl ngenh thwenew, ayenh rlwateyew. ³³ Ra mwerr ngkweng mpwaremer, ngarl mwanty arraty iterrew-angkwarr. Ntwā ayenh artwerelew, akngerr ipmew atwewerr, ayengan ahelarl apetyenh.

³⁴ Innga INGKARTelarl ayenh artwerelew, ngkwenh-rnem atwewerr. Nga anamerl-antey atyeng arnekerrew, atha atemwengkel-antey atwewerr artwā, awey-rnem-then ingkerr apmer ngkwenh-itwew!”

³⁵ Rap ilew artwā ikwerenh-rnem, ilek-ilek amern ingkerr ineyew, Abigail-elarl akngetyew. Rap angkew ikwer, “Alpanem inkwerelhemel apmer ngkwenh-warl. Ayengarl ngkweng awelheew, athap mpwarem, ntwarl ayernew-angkwarr.”

³⁶ Arelh ra alpenh apmer-warl, arrwekelan akngerr akarrerrew apmer ikwerenh-itwew, amern kwenty arlkwerreyew artwamp ikwerenh-itwel. Nabal-an inkwerelhemel aylelhenh ngkwarl-penh. Abigail-arl aney-alpewel, ra iley-angenh-antey artwamp renh, David-akert. ³⁷ Ingwepenhan Nabal awelhenh mwerr-anem, Abigail-el renh ilew-anem angka apmwerrkeny. Rarl awewel, inweng-weny irreyelpew, arntety-anem. Rap lerrp-anem irrew, nthakenh akngelhey-angenh-anem.

38 Arlta 10-penh INGKARTel atwew-anem renh, rap ilwew-anem.

39-40 David-elarl awew, rarl ahaperrew, rap angkew, “Nakem INGKART! Artwamp ra apmwel-ayeth atyeng angkenh. INGKARTel renh ywerrelhelew, apmwel-ayetharl angkenh-penh. Ra ayenh artwerelew arrpemar, apmwa mpwarewerr.”

David-el angka thwewnew Abigail-warl, renh ay-ernew, itengerreyew ikwer-warl. Rap angkakert-rnem thwewnew apmer ikwer-warl Carmel-warl, rernemap angkey-alhew Abigail ikwer, “David-el anenhantherrenh thwewnew. Nga ikwerenh-anem aneyew.”

41 Ra kwenerremel angkew alakenh, “Ya, ayeng alpem. Ayeng ikwer warrkerrem artwa ikwerenh-rnemew-then, ingkety-then apek irrarlk-aynteyew.” 42 Rap nganew tangkey-warl anamerl-antey, anpenhew-anem. Arelh warrkenh-rnem 5 alpew arrpemar ikwer-angkwarr. Rernemap ingkerr-antey alpew-anem David-warl. Ratherr iteng-anem irrew.

43-44 David-wenh akelty arrwekeleny itnan Michal, Saul-wenh alerikw. Saul-elap renh rakeynew, artwa ingwer-warl-anem anthew Paltiel-warl, apmer Gallim-areny-warl. David-elan akelty ingwer-anem inew itnan Ahinoam, apmer Jezreel-areny. Ikwer-theyan rap Abigail-anem pweytelew Ahinoam-warl.

26

David-el Saul nyerrel-antheyel arrpemar

¹ Ingwer-ingweran artwernem apmer Ziphareny-rnem Gibeah-warl alhew, Saul-ew nthweyew. Rernemap angkew, "David-rnem irrtiert-anew-aneyel apwert Hakilah-itwew Jeshimon-itwew."

² Anamerl-antey Saul-el akarrelew artwa ahawarr-rnem Israel-wenh 3,000. Alhewanem, David-ew nthweyew apmer ikwer-warl.

³ Rernemap ayntey-alhew apwert-ampeny-itwew iwerrel. David-rneman irrtiert-anew-anenh-antey apmer aterterr-ampeny-itwew. Rarl awewel, Saul apwert Hakilah-itwew aney-alhew, ⁴ rap thwenew artwa ikwerenh-rnem areyew. Rernemap irrtiert-they arerl-alpew, Saul ikwerenh-rnem-akertarl anenh.

⁵ Ingwelan David alhew apmer Saul-wenh-warl. Irrtiert-they rap renh arey-alhew atyet-yart ahawarr-then Abner, alerikw Ner-wenh. Ratherr ampepel ayntenh, artwa ahawarr-rnemelan renh-atherr ampepewelew.

⁶ Artwa atherr alhew David-angkwarr, Ahimelech-an artwa Heth-arl alhenh, Abishai-an Zeruah-wenharl. Zeruah ra David-wenh angkwerikwarl, rap ampikw atherr atnyenew, Joab-then Abishai-atherr. Awayikwan ikwerenh Joab. David-el ayernew, "Angwenh anyent apetyem atyeng-angkwarr Saul-warl?"

Abishai-an angkew, "Ayeng alhem."

⁷ Ampepenyel ratherr apertenhew apmer Saul-wenh-warl. Ingkerrenh ankwa apelp ayntenh. Ratherr arey-alhew Saul-atherr, ampepelarl ayntenh. Irrtiert ikwerenh rtnenh ahernel arrer-antey.

⁸ Abishai arreytew, “Atyetyartay, nhenh ara! INGKARTan ilkelheyel, ntwawamp artwamp yanh atweyew ipmew, ngkweng-warl apmwa mpwareyelan! Irrtyartel atantheyew atha akwerterrp-antey! Ra ilweyew anamerl!”

⁹ David-el tyernew, “Nthakenh ntwawamp renh atwey-angenh! INGKART ngkweng awakel-hewerr! Ra renh rlwanew, atyetyart aneyew anewantherr. ¹⁰ Ingwer-ingwer INGKART rantey renh ywerrelhelem; arntety-angkwarr apek, ahangkwarr apek, rwengk. Nthakenh aylanth atwey-angenh. ¹¹ Atha INGKART intem ayernem, atha renh atwewerr, renhan rlwanewarl. Tyampet-then irrtyart-thenant aylanth iney anterremel.”

¹² Ratherrap inerl-alhew, anterremel apmer ikwer-they. Ingwerentyel arey-angenh-antey. Ingkerrenh ankwa apelp-antey ayntenh, INGKARTelarl renh-rnem ankwathenew artewentyel.

¹³ Ratherrap artarnpenhew peleyn ingwerampeny-warl, arleng-anem apwertel rtney-alhew irrwerl. ¹⁴ David-an arlkew, “Abner! Aweyel apek ntwawamp ayenh?”

Ra tyernew, “Angwenh aley arlkeyel, atyetyartan atyekeleyel?”

¹⁵ David kwanthemel angkew, “Abner, artwawamp ilek-apeny ngan? Nga ilelhem atyetyart ahawarr ilkwa ingwer-rnem-angkwarr! Ntwawamp arntarnt-arey-angenh atyetyart ngkwenh! Ngwamp ingwerenty alhew apmer arrewantherrenh-warl, atyetyart ipmew atweyew-anew! ¹⁶ Ngan ahawarr-arrpantey ilkwa! INGKARTel ngenh

ipmew ilwerl-athenemer ahawarr ngkwenh-nem-then! Arrantherr arntarnt-arey-angenh artewenty atyetyart, rarl rlwanew! Nhak ara! Irtyart atyetyart-wenh-alew? Tyampet ikwerenh-alew?"

¹⁷ Saul akwentenhey-alpew, rap David alhengk-awew. "Malyey? Ngang aleyan angkeyel?"

¹⁸ David-el tyernew, "Ya atyetyart, ayeng angkeyel! Ilekew ntwan ayenh intem alwerneyel? Ayengan apmwelheley-angenharl! Ilekew ayenhan ayntarrp-ileyel? ¹⁹ Arternp atyeng awelha! INGKARTel apek ngenh ilew, atyeng-wety arlkarrerreyew? Kel aker apek atha arrtyem ikwer, raw atyeng awakelhey-angenharl, atweyewan angkep. Artwernemel apek ilew, atyeng-wety nga arlkarrerreyew? Kel INGKARTelan renh-rnem atwem, rernemarl ayenh irrentew atyenh-rnem-they. Nthakenh ayeng apmer atyenhel Israel-el aney-angenh-anem. Nthakenh ayeng INGKARTew aney-angenh. Alethang-apeny, apmer ingwerel-anem anem. Akngerran apmer ikwer-arenyel apentey-angenharl INGKART. ²⁰ Nthakenh ayeng apmer nhenhel ilwey-angenh, INGKART-they arleng. Ayengan akelyarl, artwa atyetyart-wenyarl. Ilekew nga atyengan nthweyel? Aker-apenyarl ntwan ayenh alwerneyel?"

²¹ Saul-an angkew, "Ayengarl apmwelhelew. Ngan mwerrarl atyeng. Nthakenh ayeng ngkweng apmwelheley-angenh arrpemar. Ntwan ayenh atwey-angenh-antey ipmew. Ayengarl

apmwelhelew artewenty. Ngan alerey atyenh-apeny. Apey-alpa atyeng-warl!”

²² David angkew, “Irrtyart ngkwenh nhantey! Artwa anyent thwena, apetyeyew ineyew.

²³ Ngwampan INGKARTEL aylenhanthenh pweytelew, atha ipmew atwey-angenh-antey ngenh. Ra ngenh rlwanew, atyetyart aneyew. Nthakenh atha ngenh atwey-angenh, arrangkw! INGKART ra mwerrarl, ikwerarl awelheyel-rnemewan, arraty-thenarl aneyel-rnemewan.

²⁴ Alakenh ayeng ilkelheyel, ra atyeng mwerr aneyew, iteth-then ayenh atnyeneyew, ngwamparl ayeng ngkweng iterrew-apeny, ipmew atwey-angenh-antey ngenh.”

²⁵ Saul-an angkew, “INGKARTEL ngenh arntarnt-arem! Ingwer-ingweran nga atyetyart ilkwa aneyenh, ilek-ilek mwerr-angker mpwarerl-aneyenh.”

David alpew-anem apmer ikwer-they, Saul alpew arrpemar Israel-warl.

28

Saul-el ayerneyel arelh ngangker-akert

... ³ Arrwekel-antey Saul-el ngangker-akert-rnem irrentew apmer Israel-they, INGKARTelarl ilew-angkwarr.

Ikwer-they artwamp angkakert Samuel ahaperrew. Israel-wenh-rnem artnalhelerrew ikwer, renh akwernew apmer ikwerenh-itwew Ramah-itwew.

⁴ Ingwer-ingwer Philistia-areny-rnem akarrerrew apmer Shunem-itwew, werreyew

Israel-wenh-rnem-then. Saul-el akarrewew ahawarr-rnem apmer Gilboa-itwew, Shunem-they arrer-antey arrpemar. ⁵ Rarl Philistia-areny-rnem arew, rap atererremel artewentyel apatew. Akgerr inngarl renh-rnem arew, ywarn-anemap iterrewan. ⁶ INGKART ra ayernew. INGKARTel renh tyerney-angenh. Altyerr-angkwarr, artwa angkakert-angkwarr-then ra tyerney-angenh, arrangkw. Apwert artwa ingkart-wenh impen renharl iwew impalkert, ra iynwanyerr apek aytneyew, INGKART renh lwewarrerney-angenh, arrangkw. ⁷ Saul angkew artwa ikwerenh-rnemew, “Arelh ngangker-akertew nthwenharey. Atha Samuel ayerneyew ikwer-angkwarr. Ra apek ayenh tyerneyew.”

Rernem ikwer angkew, “Anyentan aneyel apmer Endor-itwew.”

⁸ Rap arnkwa ingwer-warl-anem aylpew, ingwerelhelemel. Ingwel-antey ra alhew artwa atherr-akert, arelh ikwer nthweyew. Ra renh arey-alhew, rap angkew, “Aweyaw-rnemew katy angka atyeng! Artwa anyent ipma atha itnewem. Ina atyeng!”

⁹ Arelhel ra tyernew, “Ilekew ngan apetyew? Ntwa iterl-areyel, atyetyart Saul-elarl ngangker-rnem irrentew Israel-they! Ntwa ayenh irrwerneyel! Saul-el ingwer-rnem ilewerr, ayenh atweyew ipmew!”

¹⁰ Saul-el tyernew, “Atha ngenh arraty ilem, INGKARTelarl aweyel-wety. Nthakenh ngenh ingwerentyel atwey-angenh, ngkweng awakelhey-angenh!”

11 Arelhelap ayernew, “Aweyaw nthek-apeny ngkweng atha inem?”

“Artwamp angkakert weth. Ina renh atyeng.”

12 Arelh angkew Samuel-wenh inwengew, rap apetyew ikwer-warl. Rarl renh arew, rap arlkenty iwew. Ran angkew Saul-ew, “Ilekew ntwa irrtywerl-ampernewan? Ngan Saul-arl!”

13 Saul angkew, “Kelaw! Atererrey-angenh! Ilek ntwa areyel?”

Ra tyernew, “Inweng anyent atha areyel, ahern-theyarl aremerrey-ayntew nhanyem.”

14 Saul-el ayernew, “Ilek-apeny raw?”

“Artwamp arnkwa arlpenty-akert apetyeyel.”

Saul-el iterl-arew Samuel renh, rap kwen-errew, ilperr-ayntemel atnertel-ayeth ahern-itwew.

15 Samuel-ap angkew-anem, “Ilekew ntwan ayenh atyekelew, apey-alpeyew ngkweng-warl ipmethy?”

Rtnemel Saul-el tyernew, “Apmwa innganem aleyan atyeng ayntem! Philistia-areny-rnem apetyeyel, ayenh atweyew. Akngeyan atyeng-wety ilkelhey-angenh-anem, awey-angenh ayenh. Angkey-angenh atyeng artwa angkakert-angkwarr, altyerr-angkwarr apek. Arrangkw, ayeng apateyeyel-anem, aleyan ngenh-anem atha ayernem.”

16 Samuel-an angkew, “INGKARTan ngkweng-wety intwemelerrew, awalhey-angenh-anem. Nthakenh ntwa ayenhan ayerney-angenh-anem, ngenh alpemeleyew, arrangkw. 17 Ayengarl iteth anenheng-arey, ra angka ngkweng-akert arrwekel-antey ayenh ilew. Athap ngenh ilew.

Inngarlap aleyan ayntew. Ngan atyetyart Israel-ew aney-angenh-anem. INGKARTEL kel-antey arrernew atyetyart ingwer-anem ngkweng-wety. David-arlap ran. ¹⁸ Ra alakenh mpwarew, ngan ikwer awelhey-angenharl. Rarl ahelerrew Amalek-areny-rnemew, ra ngenh ilanthew, renh-rnem ingkerrenh ywerrelheleyew, atnwenth-rnem-then ikwer-rnem-wenh. Ntwanap alakenh mpwarey-angenh, rarl ilanthew-angkwarr. ¹⁹ Philistia-areny-rnemel ngenh ipmew atweyenh ahawarr ngkwenh-rnem-then. Ingwelarreng INGKARTEL ngenh iwerl-alheyenh. Philistia-areny-rnemel ngenh alerengkw ngkwenh-rnem-then ipmew atweyenh. Arrakerr apey-alpem, aney-alpeyew atyeng-itwel ipmernem-itwel.”

²⁰ Saul ra amern-weny anenh arlta anyentew. Rarl awelhewel, rap alpwyerreyelpew. Ra artewentyel atererrew aytne mel ahern-warl.

²¹ Arelhel arew, Saul-arl arrewemel ayntenh ahern-itwew, rap angkew, “Ayeng ngkweng awelhew. Ayeng atererrew, ntw a ayenh ipmew atwewerr. Athan ngkweng mpwarew, ntwarl ayernew-angkwarr. ²² Ngan atyeng-anem awel-hemer. Amern atha ngenh antheyew, ngenh rlterrkeleyew, nga alpeyew-anem apmer-warl.”

²³ Ran angkew, “Arrangkw. Nthakenh atha arlkwey-angenh.” Artwa ikwerenh-atherr irrkaty-angkwarr angkew, “Atyetyartay, amern ntw a arlkwemer!” Rap awelhew ikwer-rnem. Rap akwentew, pangkel-anem anenh.

²⁴ Kapey-kapey anterant rtenh apmer-itwew arelh-wenh, rap atwew anamerl-antey. Akerarl

ampen, amern arlety inew, rtamp-anem ampernew pikinpat-weny. ²⁵ Rap ampenganem anthew Saul-ew ingwer-atherrew-then. Rernemap arlkwerl-alhew, alpew-anem atemwengkel-antey. ...

31

Saul alerikw ikwerenh-rnem irrpety-then ilweyel

¹ Arlta ingwerelan Philistia-areny-rnem Israel-wenh-rnem-then atwerrenh, werrenh pewenarrel apwert Gilboa-itwew. Israel-wenh ahawarr akngerr ilwernerrew ikwer-itwew, ingwer-rneman aterel anterrerrew.

² Philistia-areny-rnemel Saul alwernew alerikw ikwerenh-rnem-then, rernemap renh-rnem arrerelhenhew. Alerikw ikwerenh-rnem irrpety ipmewarl atwew; Jonathan, Abinadab, Malki-Shua. ³ Ahawarr Saul-awel rtenherrenharl-rnem rernem artewenty wenh ipantey. Philistia-areny-rnemel Saul renh akngerr-inger wew pewenarrel, artertilew renh amperelemel.

⁴ Ahawarr ingwerelan alkwertarl katy antwer-rkenh. Saul angkew ikwer, "Nayp arlpenty ngkwenh ina, atanthanem ayenh ipmew! Yanh-rnemel INGKART iterl-arey-angenh-rnemel ar-kentelhelewerr ayenh, ayenh-mernt atwew-err!"

Ahawarran atererrew, nthakenh renh atwey-angenh. Saul ran amentel-antey nayp ikwerenh inew, atanthelhemel atnert-antey ipmew. ⁵ Artwa ahawarrel arew, atyetyart ikwerenh ipmarl ayntenh, ranemarl ipmew atanthelhehew.

⁶ Saul, alerikw ikwerenh-rnem, artwa ikwerenh alkwert akngerl-aney-angker-then ingkerrenh-antey rernem ilwernerrew arlta ikwerel.

⁷ Angka apmwa arlpimperrew Jezreel, Jordan-angkwarr. Israel-wenh-rnemelarl awew apmer ikwer-atherr-ampeny-they, rernem anterrew aterel. Apmerant-anem aynteyelpew. Philistia-areny-rnem-anemarl aney-alpew apmer Israel-wenh-rnem-wenh-itwew.

⁸ Arlta ingwerelan Philistia-areny-rnem angkep alpew apwert Gilboa-warl, ilek-ilek ineyew ipmernem-wenh. Saul rernem arey-alhew ipma arrpemarl alerikw ikwerenh-rnem-then irrpety.

⁹ Renhap ahenty-anem akerrth-atwew, lhelpelshew arnkwa awerr ahew-arelh. Akgerr anterenh apmer

arrpanenh-warl Philistia-ampeny-warl, angka inkwerelhemel ileyew. Rernemap aylpenhew warl kwenerreyew-arelh-warl, altyerr ikwer-rnem-wenh-warl nakemel aylelherreyew.

¹⁰ Arnkwa awerr Saul-wenh arrernew warl yanh-ikwer-warl, rernemarl altyerr amarl Astarte-warl kwenerrenh-warl. Saul ipma rernem atanthew parrik-warl apmer Beth Shan-itwew aketh-ampeny.

¹¹ Angka apmwa awew apmer Jabesh Gilead-ampeny-they-then. Rernem arlka apmwerrew, Philistia-areny-rnemelarl alakenh mpwarew Saul ikwer. Rernemap iterl-arew, rarl renh-rnem alpemelenh arrwekel-antey.

¹² Artwa arnkaty-rnem ingwel-antey alhew, Jabesh-they ankwakel alhemel Beth Shan-warl, ipmernem inerl-alpeyew. Rernemap ipma aynenheng-rnem

atwarrelheley-alhew warl-they, akngeynemel
Jabesh-warl. Apmer ikwer-rnem-wenh-itwew
renh-rnem arrtyey-alpew, ¹³ ngkwern-rnem
akwernemel arwerl awenth anyent intert-
itwew. Arlta 7-ew-atety rerneman amern
arkwey-angenh anew amperrngerremel, Saul-
ew iterremel.

Alyawarr Bible
Portions of the Holy Bible in the Alyawarr language
of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 9 Mar 2024 from source files dated 10 Nov 2023

284d4e02-292d-5bd8-a8a6-8360a307b937